

**FEDERALNO MINISTARSTVO
POLJOPRIVREDE, VODOPRIVREDE I ŠUMARSTVA**

PREDNACRT

ZAKON O ŠUMAMA

Sarajevo, studeni/novembar 2011. godine

I OPĆE ODREDBE

Član 1. (Predmet)

Ovim zakonom uređuje se očuvanje i zaštita šuma i šumskog zemljišta, jačanje njihovih ekoloških funkcija, planiranje u šumarstvu i upravljanje šumama i šumskim zemljištem, ekonomske funkcije, socijalne funkcije, finansiranje biološke obnove i unapređivanje šuma na teritoriji Federacije Bosne i Hercegovine (u daljem tekstu: Federacija).

Član 2. (Šume i šumska zemljišta)

(1) Šume i šumska zemljišta su temeljni prirodni resurs čije vrijednosti se manifestiraju kroz ekološke, socijalne i ekonomske funkcije.

(2) Šume i šumska zemljišta uživaju posebnu brigu i zaštitu Federacije, kantona i jedinica lokalne samouprave i koriste se pod uslovima i na način koji su propisani ovim Zakonom.

Član 3. (Definicija šuma i šumskih zemljišta)

(1) Pod šumom, u smislu ovog zakona, podrazumijeva se zemljište obraslo šumskim vrstama drveća i grmlja čija površina prelazi 1000 m² i čija je širina najmanje 20 metara i ako njihove krošnje pokrivaju više od 30% zemljišta. Šume se smatraju ekosistemima.

(2) Šumom se smatraju i šumski rasadnici, plantaže šumskog drveća, čistine za trase dalekovoda i drugu javnu infrastrukturu u šumi koja se koristi po osnovu prava za prelazak preko tuđeg zemljišta, šumski putevi i druga šumska transportna i protivpožarna infrastruktura, dijelovi zemljišta koji su predmet pošumljavanja, površine namjenjene rekreaciji, kao i jezera, tekuće površinske vode i druge površinske vode i močvare unutar šuma kojima se ne upravlja posebnim zakonom.

(3) Šumsko zemljište, pored zemljišta obraslog šumom, obuhvata i, područja sa smanjenim šumskim pokrivačem čije krošnje prekrivaju manje od 30% zemljišta, neiskorišteno ili neplodno zemljište izvan šume u onom omjeru u kojem obezbjeđuje ili potpomaže funkcije susjedne šume, a što obuhvata krš, čistine, livade i pašnjake unutar šuma.

(4) Šumom se ne smatraju groblja pokrivena drvećem, rasadnici šumskog drveća izvan šuma, izolovane grupe šumskog drveća na površini do 1000 m² kao i šumsko drveće i grmlje u urbanim parkovima i drugim naseljenim područjima.

(5) U slučaju sumnje ili spora da li se neko zemljište obraslo šumskim drvećem smatra šumom, odnosno, da li se neko zemljište smatra šumskim zemljištem, odluku donosi kantonalni ministar nadležan za poslove šumarstva (u daljem tekstu: kantonalni ministar) na osnovu mišljenja kantonalne uprave za šumarstvo (u daljem tekstu: kantonalna uprava).

Član 4. **(Definicije pojmova)**

Pojmovi koji se koriste u ovom zakonu imaju sljedeća značenja:

1. **Cijena drveta na panju** je cijena koja se dobije kada se ostvareni prihod od prodaje šumskih drvnih sortimenata na stovarištu umanji za ostvarene proizvodne troškove sječe, izrade i izvoza istih do stovarišta i podijeli na njihovu ukupnu neto drvenu masu bez obzira na strukturu. Cijena drveta na panju je sastavni dio osnovnog cjenovnika iz tačke 13. ovog člana.
2. **Čista sječa** znači sječu svih ili praktično svih stabala u sastojini koja nije u skladu sa dokumentima prostornog uređenja predviđena za promjenu namjene šumskog zemljišta, izlažući taj dio zemljišta ekološkim uslovima goleti čime se stvaraju ozbiljne poteškoće za stanište ili susjedne sastojine.
3. **Doznaka** podrazumjeva odabiranje, obilježavanje i evidentiranje stabala za sječu.
4. **Funkcije šuma su:**
 - a) **ekološke:** zaštita diverziteta šumskih ekosistema, zaštita staništa, zaštita zemljišta, zaštita voda, klimatska, uključujući ulogu šuma u vezivanju ugljika iz zraka;
 - b) **socijalne:** nauka, istraživanje, obrazovanje, odbrana, zaštita naselja, objekata i infrastrukture, turizam, rekreacija, pejzažno-estetske funkcije, istorijske funkcije, umjetnost, duhovno-spiritualne funkcije i unaprijeđenje kvaliteta življenja stanovništva.
 - c) **ekonomske:** prihod od proizvodnje drveta i nedrvnih šumskih proizvoda.
5. **Gospodarenje šumama** obuhvata uzgajanje, zaštitu i korištenje šuma i šumskog zemljišta u skladu sa kriterijima za održivo gospodarenje šumama i odredbama šumskoprivredne osnove;
6. **Gospodarska jedinica** je osnovna prostorna uređajna jedinica šume i šumskog zemljišta na kome se obezbjeđuje trajnost gospodarenja.
7. **Izvođač radova u šumarstvu** je pravno lice koje je registrovano za izvođenje radova u šumarstvu te u stalnom radnom odnosu ima uposlenog najmanje jednog diplomiranog inženjera šumarstva/bačelor šumarstva i posjeduje odobrenje kantonalnog ministarstva nadležnog za poslove šumarstva (u daljem tekstu: kantonalno ministarstvo).
8. **Korisnik šuma** je šumsko-privredno društvo koje na osnovu ugovora zaključenog u skladu sa odredbama ovog zakona obavlja poslove gospodarenja državnim šumama.
9. **Korištenje šume** obuhvata sječu i transport drveta, sabiranje nedrvnih šumskih proizvoda uključujući i prodaju šumskih drvnih sortimenata i nedrvnih šumskih proizvoda.
10. **Krčenje šume** u smislu ovog zakona je promjena namjene šumskog zemljišta. Izgradnja objekata u šumi i na šumskom zemljištu potrebnih za gospodarenje šumama kao i za prehranu i uzgoj divljači ne smatra se krčenjem.
11. **Kriteriji za održivo gospodarenje šumom** jesu:
 - a) održavanje i odgovarajuće poboljšanje šumskih ekosistema i njihov doprinos globalnome ciklusu ugljika,
 - b) održavanje zdravlja i vitalnosti šumskog ekosistema,
 - c) održavanje i poticanje proizvodnih funkcija šume,
 - d) održavanje, očuvanje i odgovarajuće poboljšanje biološke raznolikosti u šumskom ekosistemu,

- e) održavanje i odgovarajuće poboljšanje zaštitnih funkcija u upravljanju šumom (posebno tla i vode) i
- f) održavanje drugih socijalno-ekonomskih funkcija i uslova.

12. **Krš** je jedinstven oblik reljefa s posebnim hidrogeološkim i geomorfološkim značajkama, u kojem je podzemno vodno oticanje znatno bogatije od nadzemnog, u kojem se površinske razvodnice znatno razlikuju od podzemnih i u kojem se javljaju posebni površinski fenomeni (škrape, ponikve, uvale, polja i dr.) i podzemni oblici (špilje i jame) u tektonski razlomljenim karbonatnim stijenama. Može biti pokriven šumskom vegetacijom ili bez nje (goli krš).
13. **Osnovni cjenovnik** šumskih drvnih sortimenata (u daljem tekstu: cjenovnik) donosi kantonalna uprava na kraju tekuće godine, a najkasnije do 25. decembra, za narednu godinu. Cjenovnik se donosi za svakog korisnika šuma pojedinačno na osnovu prosječne postignute cijene prodajom šumskih drvnih sortimenata tržišnim načinom prodaje. Cjenovnik služi za utvrđivanje početne cijene šumskih drvnih sortimenata za javnu ponudu u narednoj godini, utvrđivanje naknade za korištenje državnih šuma i nakande za obavljanje stručnih poslova u privatnim šumama.
14. **Otvorena vatra** je svaka zapaljena vatra izvan zatvorenog objekta koji je pod krovom i zatvorenim ognjištem.
15. **Pravno lice za obavljanje stručnih poslova u privatnim šumama** je privredno društvo registrovano u skladu sa odredbama Zakona o registraciji poslovnih subjekata u Federaciji Bosne i Hercegovine („Službene novine Federacije BiH“, br. 27/05, 68/05 i 43/09) kod nadležnog suda za obavljanje poslova u šumarstvu u skladu sa Zakonom o klasifikaciji djelatnosti u Federaciji Bosne i Hercegovine („Službene novine Federacije BiH“, broj 64/07), koje posjeduje odobrenje kantonalnog ministarstva nadležnog za poslove šumarstva i u stalnom radnom odnosu ima uposlenog najmanje jednog diplomiranog inženjera šumarstva/mastera šumarstva sa položenim stručnim ispitom iz oblasti šumarstva (u daljem tekstu: stručni ispit).
16. **Površinske vode** su stalni i povremeni površinski vodeni tokovi, te stajaće vode.
17. **Prava trećih lica** na šume su prava na korištenje šumskih proizvoda koja postoje u skladu sa obligacionim pravom i upisana su u zemljišnoj knjizi.
18. **Pustošenje šuma** podrazumijeva narušavanje stabilnosti šuma, podbjeljivanje stabala, veće oštećivanje stabala i njihovih dijelova, veće uništavanje i oštećivanje podmlatka, kao i svaka druga radnja kojom se slabi prinosa snaga šume i šumskog zemljišta, ugrožava opstanak šume i njihove funkcije.
19. **Sanitarna sječa** znači sječju oboljelih, insektima napadnutih, oštećenih ili izvaljenih stabala.
20. **Šumska infrastruktura** su šumski putevi, kontrolne rampe, stalne šumske vlake, stalne žičare i druge šumske komunikacije i objekti u šumama koji su namijenjeni za gospodarenje šumama.
21. **Šumski požar** je požar koji nastaje i širi se se šumom i šumskim zemljištem ili koji nastaje na drugom zemljištu i širi se šumom i šumskim zemljištem.
22. **Šumski proizvodi** su svi proizvodi šuma i šumskog zemljišta, uključujući, ali ne ograničavajući se na:
 - a) šumsko drveće i grmlje;
 - b) biomasu ukupne šumske vegetacije;
 - c) cvjetove, sjeme, koštunjčavo voće, bobičaste i druge plodove, koru drveta, korijen, šišarke i plodove druge vegetacije unutar šume;

- d) ljekovito, aromatsko i jestivo bilje i druge biljke i njihove djelove;
- e) gljive;
- f) biljni sok i smola;
- g) med;
- h) divljač i ostale životinje koje žive u šumi;
- i) ribe, puževe i rakove;
- j) travnati ili pašnjački prekrivač;
- k) humus, glina, treset, zemlju, pijesak, šljunak i kamen sa površine zemlje.

Proizvodi iz al. b) -k) ove tačke predstavljaju nedrvne šumske proizvode.

23. **Šumski putevi** su putevi sa pratećom infrastrukturom, koji su namijenjeni za prijevoz šumskih proizvoda i sav saobraćaj vezan za gospodarenje šumama. Vlake nisu šumski putevi.
24. **Šumski reprodukcioni materijal** je:
- a) **Sjeme**: šišarke, plodovi i sjeme namijenjeno za proizvodnju biljaka;
 - b) **Dijelovi biljaka**: grančice i snopovi rezanih grana namijenjeni za proizvodnju biljaka;
 - c) **Mlade biljke**: biljke uzgojene iz sjemena ili dijelova biljke, uključujući i mlade biljke iz prirodnog podmlatka.
25. **Šumsko uzgojnim mjerama** se smatraju sve mjere i aktivnosti koje doprinose osnivanju novih sastojina u šumi i poboljšanju njihove stabilnosti, raznolikosti ili kvaliteta.
- Šumsko uzgojne mjere uključuju:
- a) **Mjere za obnovu šuma**, odnosno za stvaranje novih sastojina;
 - b) **Njegu šuma u mladim razvojnim fazama**, uključujući proredu mlađih sastojina;
 - c) **Specijalnu njegu** mladih faza u prebornim šumama i drugim raznolikim šumama, izdanačkim šumama, kao i njegu rubova šuma;
 - d) **Rekonstrukciju i konverziju** izdanačkih šuma, makija, šikara i šibljaka.
26. **Trajnost gospodarenja šumama** podrazumjeva korištenje proizvoda šuma i upotrebu šuma i šumskih zemljišta na način i sa intenzitetom koji će očuvati njihov biodiverzitet, proizvodnost, sposobnost obnavljanja, vitalnost te povećati njihov potencijal da sada i u budućnosti obavljaju značajne ekološke, ekonomske i socijalne funkcije na lokalnom i globalnom nivou, a da se pri tom ne ugrozi funkcionisanje drugih ekosistema.
27. **Upravljanje šumama i šumskim zemljištima** podrazumjeva administrativno-upravne poslove koji se sastoje od kreiranja jedinstvene šumarske politike, dugoročnog (strateškog) i srednjoročnog planiranja, kontrole i stručnog nadzora korištenja šuma i šumskog zemljišta u cilju očuvanja i unaprijeđenja trajnosti gospodarenja šumama.
28. **Vlasnici privatnih šuma** su pravna i fizička lica koja su na zakonit način stekla pravo vlasništva nad šumom i šumskim zemljištem što se dokazuje izvodom iz zemljišnih knjiga. Na zakonit način stečena prava na korištenje cijele ili dijelova šume ili šumskog zemljišta, ne smatraju se vlasništvom u smislu ovog zakona.
29. **Zaštita šuma** je skup mjera i aktivnosti koje su dužni preduzimati vlasnici i korisnici koji gospodare šumama radi zaštite šuma od požara, drugih elementarnih nepogoda, štetnih organizama, bolesti i štetnih antropogenih uticaja.

Član 5.
(Gramatička terminologija i principi ravnopravnosti spolova)

(1) Gramatička terminologija korištenja muškog ili ženskog roda podrazumijeva uključivanje oba roda u ovom zakonu i propisima donesenim na osnovu ovog zakona.

(2) Pravilnici, evidencije, registri, obrasci, izvještaji i drugi akti nastali temeljem ovog zakona odražavaće principe ravnopravnosti spolova, te ukoliko sadrže statističke podatke, isti trebaju biti razvrstani po spolu.

II. PLANIRANJE I PRIVREĐIVANJE U ŠUMARSTVU

A. Planiranje u šumarstvu

Član 6.
(Šumarski program Federacije)

(1) Šumarski program Federacije poštujući međunarodnu i domaću legislativu definiše opću politiku šumarstva, gospodarenja šumama i šumskim zemljištima, kao i politiku gospodarenja sa divljači na teritoriji Federacije, orijentisanu u pravcu očuvanja i trajnosti gospodarenja šumama uključujući održavanje i unapređivanje diverziteta šumskih ekosistema.

(2) Šumarski program Federacije sastoji se iz dva dijela:

- a) Opći dio, koji određuje glavne ciljeve, principe i smjernice za trajno gospodarenje šumama u Federaciji, na osnovu stvarnog stanja šuma, domaćih i međunarodnih obaveza u vezi sa šumarstvom, uvažavajući međunarodno dogovorene smjernice za trajno gospodarenje šumama;
- b) Izvedbeni dio u kome se postavljaju i razrađuju ciljevi utvrđeni Općim dijelom i određuje način njihove realizacije u određenom roku, uključujući finansiranje.

(3) Opći dio Šumarskog programa Federacije donosi Parlament Federacije Bosne i Hercegovine (u daljem tekstu: Parlament Federacije BiH).

(4) Vlada Federacije Bosne i Hercegovine (u daljem tekstu: Vlada Federacije BiH) donosi izvedbeni dio Šumarskog programa Federacije koji predstavlja osnovu za korištenje namjenskih sredstava Budžeta Federacije Bosne i Hercegovine (u daljem tekstu: Budžeta Federacije BiH) i budžeta kantona u skladu sa odredbama ovog zakona.

(5) Opći dio Šumarskog programa Federacije donosi se za period od 30 godina sa mogućnošću njegove revizije u skladu sa dinamikom realizacije izvedbenog dijela. Izvedbeni dio Šumarskog programa Federacije se donosi za period od pet godina.

(6) Federalna uprava za šumarstvo (u daljem tekstu: Federalna uprava) izrađuje nacrt Šumarskog programa Federacije BiH i putem Federalnog ministarstva poljoprivrede, vodoprivrede i šumarstva (u daljem tekstu: Federalno ministarstvo), dostavlja ga Vladi Federacije BiH.

Član 7. (Kantonalni šumsko-razvojni plan)

(1) Kantonalni šumsko-razvojni plan izrađuje se svakih deset godina za sve šume i šumsko zemljište, bez obzira na vlasništvo s ciljem da se obezbijedi trajnost gospodarenja šumama na području kantona.

(2) Pored smjernica iz Šumarskog programa Federacije kantonalni šumsko-razvojni plan uvažava smjernice za gospodarenje prirodnim i kulturnim nasljeđem u šumama i na šumskom zemljištu, uslove za gospodarenje vodama, kao i potrebe razvoja lokalne zajednice.

(3) Kantonalni šumsko-razvojni plan sadrži najmanje sljedeće:

- a) kartu sa ucrtanim granicama šuma i šumskog zemljišta, granicama šumskoprivrednih područja i gospodarskih jedinica, granice općina i kategoriju nosioca prava na šumama;
- b) procjenu funkcija šuma i njihov uticaj na okoliš;
- c) klasifikaciju šuma po površinama, prema njihovim funkcijama i prirodnim karakteristikama, a koje se posebno odnose na stanište;
- d) procjenu drvne zalihe i njenog kvaliteta, prirasta, podmlađivanja, biodiverziteta i zdravstvenog stanja;
- e) smjernice za gospodarenje šumama različitih gazdinskih klasa i kategorija šuma;
- f) otvorenost šuma sa planom izgradnje novih šumskih puteva;
- g) smjernice za pošumljavanje šumskog zemljišta;
- h) procjenu ugroženosti šuma od požara, određenu po stepenu opasnosti i smjernice za zaštitu šuma od požara;
- i) smjernice za korištenje nedrvenih šumskih proizvoda;
- j) smjernice za lovstvo i gospodarenje divljači;
- k) program bioloških i tehničkih investicija i rentabilnost radova.

(4) Kod izrade kantonalnog šumsko-razvojnog plana koriste se podaci iz šumsko privrednih osnova i lovno privrednih osnova.

(5) Vlada kantona donosi kantonalni šumsko-razvojni plan, a kantonalno ministarstvo nadležno za poslove šumarstva (u daljem tekstu: kantonalno ministarstvo) je odgovorno za njegovu pripremu, izradu i realizaciju.

(6) Kantonalno ministarstvo je dužno prilikom izrade plana zatražiti od svih zainteresovanih strana a posebno od zainteresiranih jedinica lokalne samouprave da daju svoje prijedloge i mišljenja.

(7) Kantonalno ministarstvo prije donošenja kantonalnog šumsko-razvojnog plana pribavlja saglasnost Federalnog ministarstva, o njegovoj usklađenosti sa Šumarskim programom Federacije.

(8) Kantonalna ministarstva dužna su trajno čuvati kantonalni šumsko-razvojni plan.

Član 8. (Inventura šuma)

Radi utvrđivanja i praćenja stanja, provodi se inventura šuma na velikim površinama. Inventura šuma na velikim površinama vrši se kontinuirano svakih dvadeset godina računajući od godine završetka prethodne inventure, a provodi je Federalna uprava u saradnji sa kantonalnim upravama.

Član 9. **(Šumsko privredno područje)**

(1) U cilju obezbjeđenja racionalnog i trajnog gospodarenja državnim šumama i šumskim zemljištima formira se šumsko privredno područje u koje ulaze i površine krša kao posebne gospodarske jedinice.

(2) Šumsko privredna područja predstavljaju u geografskom, prometnom, ekološkom i ekonomskom pogledu jednu zaokruženu cjelinu u okviru koje se osigurava trajnost gospodarenja šumskim ekosistemima.

(3) U administrativnim granicama jednog kantona može se formirati jedno ili više šumsko privrednih područja.

(4) Šumsko privredno područje dijeli se na gospodarske jedinice.

(5) Formiranje šumsko privrednog područja zasniva se na stručnom elaboratu Federalne uprave. Stručni elaborat pored prijedloga sa obrazloženjem i prikazom bioloških, tehničkih i ekonomskih pokazatelja sadrži naročito:

- a) preglednu kartu područja sa ucrtanim izohipsama, vanjskim granicama šumsko privrednog područja, granicama unutrašnje podjele šuma po gospodarskim jedinicama i odjeljenjima, ucrtanom mrežom trajnih šumskih puteva, izvorištima i vodotocima, objektima koji su od značaja za gospodarenje šumama i opis granica šumsko privrednog područja;
- b) popis katastarskih parcela po katastarskim općinama i zemljišnoknjižnim ulošcima, sa kulturama, klasama i površinama koje ulaze u šumsko privredno područje;
- c) podatke o drvnj zalihi po gospodarskim jedinicama, kategorijama šuma i vrstama drveća;
- d) ukupan godišnji zapreminski prirast po kategorijama šuma i vrstama drveća;
- e) prosječan godišnji etat po kategorijama šuma i vrstama drveća;
- f) procjenu prihoda i rashoda gospodarenja šumama i šumskim zemljištima u okviru šumsko privrednog područja;
- g) podatke o mogućnostima korištenja nedravnih šumskih proizvoda, divljači, turizma, sporta i rekreacije;
- h) prikaz podataka iz tač. c), d), e), f) i g) po općinama.

(6) Odluku o formiranju šumsko privrednih područja ili reviziji njihovih granica donosi Vlada Federacije BiH na prijedlog Federalnog ministarstva koji se zasniva na stručnom elaboratu iz stava 5. ovog člana i mišljenju kantonalnog ministarstva.

Član 10. **(Šumsko privredna osnova)**

(1) Šumama na prostoru jednog šumsko privrednog područja se gospodari po odredbama šumsko privredne osnove, godišnjeg plana realizacije šumskoprivredne osnove i projekta za izvođenje. Odredbe šumsko privredne osnove su obavezne. Šumsko privredna osnova mora biti usklađena sa smjernicama Šumarskog programa Federacije i kantonalnim šumsko-razvojnim planom.

(2) Šumsko privredna osnova, prostorni plan, plan upravljanja vodama vodnog područja, lovno privredna osnova, evidencije koje se vode u Zavodu za zaštitu kulturno historijskog i prirodnog naslijeđa i federalni program upravljanja mineralnim resursima te planovi korištenja pojedinih mineralnih sirovina moraju biti međusobno usklađeni.

(3) Izuzev od odredaba stava 1. ovog člana, ako ne postoje objektivne mogućnosti pravovremene izrade nove šumsko privredne osnove, državnim i privatnim šumama može se gospodariti najduže dvije godine na osnovu godišnjeg plana gospodarenja za koji je postupak donošenja isti kao i za šumsko privredne osnove. Odredbe godišnjeg plana gospodarenja su obavezne. Godina izvršenja godišnjeg plana gospodarenja smatra se godinom izvršenja nove šumsko privredne osnove.

(4) Ukupan obim sječa predviđen šumsko privrednom osnovom za uređajni period, po vrstama drveća i gazdinskim klasama, ne može se prekoračiti. Od ukupno planirane količine sječe za uređajni period za visoke šume sa prirodnom obnovom, u okviru šumsko privrednog područja godišnje se realizuje prosječna godišnja količina.

(5) Kada se u jednoj ili više proteklih godina uređajnog perioda realizuje manje od predviđenog godišnjeg obima sječe u okviru šumsko privrednog područja, može se u narednim godinama uređajnog perioda realizovati preostali dio količine sječe.

(6) Šumsko privredna osnova za državne šume donosi se za šume u granicama jednog šumsko privrednog područja, a za privatne šume donosi se jedinstvena šumsko privredna osnova za sve šume jedne općine.

(7) Elektronski i ostali dokumenti izrađeni/pripremljeni tokom izrade šumsko privrednih osnova, dostavljaju se uz istu, deponuju i čuvaju u Federalnoj upravi a pravo korištenja ovih podataka ima i kantonalno ministarstvo, jedinica lokalne samouprave na čijoj teritoriji se nalazi šuma, vlasnici i korisnici šuma.

(8) Svi digitalni podaci dostavljaju se u obliku koji omogućava njihovo korištenje.

(9) Bilo kakva komercijalna i druga upotreba gore pomenutih podataka/dokumenata nije dozvoljena bez saglasnosti Federalne uprave.

(10) Šumsko privredna osnova izrađuje se za period od deset godina.

Član 11.

(Izrada i donošenje šumsko privredne osnove)

(1) Šumsko privrednu osnovu za državne i privatne šume izrađuje Federalna uprava.

(2) Šumsko privredne osnove za šume u državnom vlasništvu donosi Federalna uprava na osnovu saglasnosti Federalnog ministarstva, koja se izdaje na osnovu prijedloga stručne komisije, uz prethodno pribavljeno mišljenje kantonalnog ministarstva, jedinice lokalne samouprave i organa nadležnog za vode koje su isti dužni dostaviti Federalnoj upravi najkasnije u roku od 30 dana od dana prijema zahtjeva za njihovo izdavanje.

(3) Izrada šumsko privredne osnove za privatne šume finansira se iz namjenskih sredstava budžeta kantona.

(4) Šumsko privredne osnove za šume u privatnom vlasništvu donosi kantonalna uprava na osnovu saglasnosti kantonalnog ministarstva, koja se izdaje na osnovu prijedloga stručne komisije, uz prethodno pribavljeno mišljenje jedinice lokalne samouprave i organa nadležnog za vode koje su isti dužni dostaviti kantonalnoj upravi najkasnije u roku od 30 dana od dana prijema zahtjeva za njihovo izdavanje.

(5) Sastav, rad i troškove stručne komisije iz st. 2. i 4. ovog člana određuje nadležni ministar.

(6) Korisnici šuma dužni su godišnje izdvajati naknadu u iznosu 2% od ukupnog prihoda ostvarenog prodajom drveta i nedrvnih šumskih proizvoda na

poseban račun Budžeta Federacije BiH radi finansiranja izrade šumskoprivrednih osnova za državne šume.

(7) Naknada iz stava 6. ovog člana plaća se najkasnije do 31.03. tekuće godine za prethodnu godinu.

(8) Kontrolu obračuna i uplate naknade iz stava 6. ovog člana vrši šumarska inspekcija.

Član 12. **(Sadržaj šumsko privredne osnove)**

(1) Šumsko privredna osnova za državne šume obavezno sadrži:

a) uvodni dio sa razlozima za donošenje i popisom svih katastarskih parcela po katastarskim općinama koje ulaze u šumsko privredno područje;

b) stanje šuma i šumskih zemljišta u doba uređivanja uključujući i zaštićena šumska područja, objekte, rijetke vrste flore i faune, hidrološke, geomorfološke i arheološke znamenitosti;

c) analizu i ocjenu gospodarenja u proteklom uređajnom periodu;

d) plan gospodarenja šumama i šumskim zemljištima za naredni uređajni period sa:

- planom sječa,
- planom šumsko uzgojnih radova,
- planom proizvodnje i tehnologije rada,
- planom zaštite šuma,
- planom za očuvanje i unapređenje diverziteta šumskih ekosistema, ekoloških i socijalnih funkcija šume,
- planom investicionih ulaganja sa posebnim naglaskom na održavanje i izgradnju šumske transportne infrastrukture
- planom korištenja nedrvenih proizvoda šuma i

e) ekonomsko finansijsku analizu koja sadrži rekapitulaciju i obračun očekivanih prihoda i rashoda na osnovu planova iz tačke d) ovog stava.

(2) Ako postoje objektivni razlozi za odstupanje od odredaba šumsko privredne osnove, naročito zbog prirodnih nepogoda ili bitno promijenjenih gospodarskih uslova, potrebno je izvršiti njenu reviziju. Reviziju odobrava i potvrđuje Federalno ministarstvo i jedan primjerak se dostavlja nadležnom šumarskom inspektoratu.

(3) Federalni ministar donosi pravilnik kojim se propisuje izrada, kontrola prikupljanja i obrade podataka, sadržaj šumsko privredne osnove i postupak donošenja i revizije šumsko privrednih osnova za državne i privatne šume.

Član 13. **(Godišnji planovi realizacije šumsko privredne osnove)**

(1) Šumsko privredna osnova se realizuje godišnjim planovima realizacije koji sadrže prosječno jednu desetinu svih planiranih radova po osnovi.

(2) Sastavni dio godišnjeg plana realizacije šumsko privredne osnove su projekti za izvođenje svih planiranih radova.

(3) Korisnik šuma dužan je kantonalnoj upravi dostaviti godišnji plan realizacije šumsko privredne osnove nakasnije do 01.12. tekuće za narednu godinu, uz

pribavljeno mišljenje jedinica lokalne samouprave na čijem području će se izvoditi radovi predviđeni godišnjim planom. Uz godišnji plan realizacije za narednu godinu dostavlja se izvještaj o izvršenju plana za tekuću godinu i dokaz o uplati naknade za korištenje državnih šuma za tekuću godinu.

(4) Kantonalna uprava u roku od 30 dana od dana prijema godišnjeg plana realizacije šumsko privredne osnove izdaje saglasnost na isti i donosi rješenje o visini naknade za korištenje državnih šuma za narednu godinu.

(5) Ukoliko korisnik šuma nije izvršio godišnji plan realizacije za tekuću godinu u predviđenom obimu i planiranoj dinamici ili nije uplatio naknadu za korištenje državnih šuma, saglasnost na godišnji plan realizacije za narednu godinu se neće izdati.

(6) Radovi predviđeni godišnjim planom realizacije šumsko privredne osnove ne mogu se započeti bez saglasnosti kantonalne uprave. U toku godine, ukoliko za to postoje opravdani razlozi može se izvršiti izmjena godišnjeg plana na način kako je to propisano stavom (3) ovog člana.

(7) Usvojeni godišnji plan realizacije šumsko privredne osnove korisnik šuma je dužan u roku od 15 dana od dana usvajanja dostaviti kantonalnoj upravi, federalnoj i kantonalnoj šumarskoj inspekciji i jedinici lokalne samouprave na čijem području će se izvoditi radovi predviđeni godišnjim planom.

Član 14. (Projekat za izvođenje)

(1) Projekat za izvođenje izrađuje se za uređajnu jedinicu – odjel za državne šume i katastarsku parcelu/parcele za privatne šume u skladu sa godišnjim planom realizacije šumsko privredne osnove. Odredbe projekta za izvođenje su obavezne.

(2) Projekat za izvođenje sadrži planove svih potrebnih biotehničkih mjera u okviru pojedinih sastojina unutar odjeljenja a u skladu sa predviđenim ciljevima gazdovanja i to: plan sječa, plan šumsko-uzgojnih radova, plan korištenja i transporta posječene drvene mase, finansijsko-ekonomsku analizu realizacije projekta i kartu unutrašnjeg prostornog uređenja odjeljenja, mjere zaštite izvorišta i vodotoka i drugih vrijednosti unutar šumskih ekosistema. Pored planova, projekat za izvođenje sadrži procjenu uticaja radova na okoliš u skladu sa članom 34. ovog zakona i mjere zaštite na radu i protivpožarne zaštite.

(3) Radovi predviđeni projektom treba da se izvrše u roku od dvije godine od dana njegovog donošenja.

(4) Projekat za izvođenje mogu izrađivati diplomirani inženjeri šumarstva/masteri šumarstva sa položenim stručnim ispitom. Korisnik šuma, odnosno privatni vlasnik šume, određuje lice za izradu projekta.

(5) Projekat za izvođenje donosi korisnik šuma za državne šume, a za privatne šume kantonalna uprava ili pravno lice za obavljanje stručnih poslova u privatnim šumama.

(6) Izuzev od stava 1. ovog člana projekat za izvođenje može se izrađivati za više odjela u jednom slivu ako sječa i izrada sanitarnih užitaka ne prelazi više od 100 m³ po jednom odjelu.

(7) Za privatne šume rade se projekti za šumsko-uzgojne radove kao i za sječu ako je godišnji obim sječa veći od 100 m³ po vlasniku.

(8) Korisnik šuma određuje realizatora projekta, diplomiranog inženjera šumarstva/bačelora šumarstva sa položenim stručnim ispitom, koji je odgovoran za stručno izvođenje radova po projektu za izvođenje.

(9) Projekat za izvođenje ima trajan karakter i čuva se u arhivi korisnika šuma i vlasnika privatnih šuma.

(10) Korisnik šuma i vlasnici privatnih šuma dužni su da vode registar izrađenih i donesenih projekata za izvođenje i da sve izvršene radove po projektu evidentiraju u odgovarajuće evidencije.

B. Privređivanje u šumarstvu

Član 15. (Doznaka stabala za sječū)

(1) Doznaka stabala za sječū vrši se obilježavanjem stabala ili obilježavanjem površina obraslih drvećem. Obilježavanje površina za sječū može se vršiti samo u izdanačkim šumama predviđenim za direktnu konverziju u viši uzgojni oblik.

(2) Doznaku stabala za sječū u državnim šumama može vršiti diplomirani inženjer šumarstva/master šumarstva sa položenim stručnim ispitom koga odredi korisnik šuma. Izuzetno, doznaku stabala za sanitarnu sječū i doznaku stabala u izdanačkim šumama može vršiti bačelor šumarstva/šumarski tehničar sa najmanje tri godina radnog iskustva u struci koga odredi korisnik šuma.

(3) Doznaka i sječā stabala ne može se vršiti u dijelovima šume za koje imovinsko-pravni odnosi nisu riješeni, granice nisu utvrđene i na terenu vidno i na propisani način obilježene.

(4) Doznaka stabala za sječū i obim šumsko-uzgojnih radova u privatnim šumama vrši se na osnovu rješenja kantonalne uprave.

(5) Doznaka i sječā stabala, odnosno površina za sječū u privatnim šumama, može se odobriti samo vlasniku koji koji podnese dokaze o pravu vlasništva.

(6) Protiv rješenja iz stava 4. ovog člana može se izjaviti žalba Federalnom ministarstvu u roku od 15 dana od dana prijema istog.

(7) Doznaku stabala ili obilježavanje površina za sječū u privatnim šumama može vršiti diplomirani inženjer šumarstva/master šumarstva sa položenim stručnim ispitom kojeg rješenjem odredi kantonalna uprava ili pravno lice za obavljanje stručnih poslova u privatnim šumama. Izuzetno, doznaku stabala za sanitarnu sječū i doznaku stabala u izdanačkim šumama, može vršiti bačelor šumarstva/šumarski tehničar sa najmanje tri godina radnog iskustva u struci koga rješenjem odredi kantonalna uprava ili pravno lice za obavljanje stručnih poslova u privatnim šumama.

(8) Federalni ministar donosi pravilnik kojim se propisuje način doznake stabala za sječū i obilježavanja površina za sječū.

Član 16. (Sječā šuma)

(1) Stabla u šumi mogu se sjeći tek poslije donošenja projekta za izvođenje, izvršene doznake i obavještavanja kantonalne uprave.

(2) Šteta koja nastane prilikom sječē na šumskom zemljištu mora biti sanirana odmah nakon završetka izvlačenja šumskih drvnih sortimenata.

(3) Ukoliko postoji opravdan razlog za sumnju da je planirana ili započeta sječā, ili druge radnje u suprotnosti sa šumsko privrednom osnovom, godišnjim planom realizacije šumsko privredne osnove, ovim Zakonom ili propisima koji su doneseni na osnovu ovog zakona, nadležni šumarski inspektor će zabraniti izvođenje radova dok se ne otklone utvrđene nepravilnosti.

Član 17. **(Biološka reprodukcija šuma)**

(1) Korisnik državnih šuma i vlasnik privatne šume dužni su izvršavati poslove biološke reprodukcije šuma u minimalnom obimu koji je predviđen šumsko privrednom osnovom.

(2) Biološka reprodukcija šuma u smislu ovog zakona podrazumjeva:

- a) pripremu zemljišta za prirodno podmlađivanje,
- b) pošumljavanje i sjetva sjemenom šumskog zemljišta,
- c) popunjavanje, njegu i čišćenje šumskih kultura,
- d) proizvodnju šumskog sjemena i šumskog sadnog materijala,
- e) prorjeđivanje sastojina,
- f) sanaciju požarišta,
- g) prevođenje degradiranih sastojina u viši uzgojni oblik,
- h) doznaku stabala za sječū,
- i) rekonstrukciju i konverziju izdanačkih šuma, makija, šikara i šibljacka,
- j) zaštitu šuma,
- k) projektovanje, izgradnju, rekonstrukciju i održavanje šumske infrastrukture.

(3) Planirani obim biološke reprodukcije šuma u šumsko privrednim osnovama mora biti usklađen sa Izvedbenim dijelom Šumarskog programa Federacije i kantonalnim šumsko-razvojnim planom.

Član 18. **(Tehnički prijem radova)**

(1) Za izvedene radove po projektu za izvođenje vrši se tehnički prijem radova, a najkasnije u roku od 30 dana od dana okončanja radova.

(2) Komisiju za tehnički prijem radova formira kantonalna uprava po prijemu zahtjeva korisnika odnosno vlasnika šuma. Zahtjev za tehnički prijem radova podnosi se najkasnije u roku od pet dana od dana završetka radova.

(3) Komisija za tehnički prijem radova sastoji se od tri člana u koju obavezno ulaze diplomirani inženjer šumarstva/master šumarstva koji je izradio projekat za izvođenje radova i dva diplomirana inženjera šumarstva/master šumarstva predstavnika kantonalne uprave sa položenim stručnim ispitom. Realizator projekta ne može biti član komisije.

(4) Ako se prilikom tehničkog prijema utvrdi da radovi nisu izvršeni u skladu sa projektom za izvođenje, korisnik šuma, odnosno vlasnik šuma, je dužan utvrđene nedostatke otkloniti i radove izvršiti u roku koji odredi komisija. Nakon isteka roka komisija vrši ponovni pregled.

(5) Tehnički prijem radova pošumljavanja vrši se poslije dvije godine od završetka njihovog izvođenja.

(6) O izvršenom tehničkom prijemu izvedenih radova, komisija sačinjava zapisnik u kojem se obavezno konstatuje uspjeh, obim i kvalitet izvršenih radova po projektu za izvođenje.

(7) Primjerak zapisnika komisije dostavlja se u roku od osam dana od dana završetka pregleda i nadležnom šumarskom inspektoratu.

(8) Svi izvršeni radovi i nalaz komisije evidentiraju se u propisane knjige evidencije.

Član 19. **(Obavljanje radova u šumarstvu)**

(1) Radove u šumi mogu izvoditi samo fizička lica koja su obučena za izvođenje odgovarajućih poslova.

(2) Pravna lica koja obavljaju poslove u šumama dužna su obezbijediti mjere zaštite na radu u skladu sa propisima iz oblasti zaštite na radu i protivpožarne zaštite i obavezna su sprovesti adekvatnu obuku zaposlenih.

(3) Federalni ministar donosi pravilnik kojim se propisuju uslovi koje moraju ispunjavati izvođači radova u šumarstvu.

Član 20. **(Stručni šumarski ispit)**

(1) Za obavljanje stručnih poslova u šumarstvu polaže se stručni šumarski ispit.

(2) Stručni šumarski ispit mogu polagati diplomirani inženjeri šumarstva sa VII 1. stepenom VSS, masteri šumarstva i bačelori šumarstva koji su stekli ova zvanja po Bolonjskom procesu obrazovanja, sa najmanje dvije godine radnog iskustva u struci nakon stjecanja stručnog zvanja.

(3) Polaganja stručnog šumarskog ispita oslobođeni su diplomirani inženjeri šumarstva, masteri šumarstva i bačelori šumarstva sa više od deset godina radnog iskustva u struci nakon sticanja stručnog zvanja kao i magistri i doktori šumarskih nauka.

(4) Federalni ministar donosi pravilnik o uslovima i načinu polaganja stručnog šumarskog ispita.

Član 21. **(Zabrana čistih sječa i drugih oblika pustošenja šuma)**

(1) Nisu dozvoljene čiste sječe i drugi oblici pustošenja šuma.

(2) Čiste sječe mogu biti izvršene u posebnim slučajevima u pripremi šumsko uzgojnih zahvata s ciljem unapređenja šumskih sastojina u mjeri koja je planirana šumsko privrednom osnovom.

(3) Čista sječa šuma može se primjeniti ako je neophodna zbog sanitarnih razloga ili provođenja preventivnih zaštitnih mjera uz odobrenje kantonalne uprave.

Član 22. **(Pošumljavanje sječina i paljika)**

(1) Sve površine nastale čistom sječom i paljike moraju biti pošumljene u roku od dvije godine nakon sječe ili šumskog požara, prirodnom obnovom ili putem pošumljavanja.

(2) Ako se ne očekuje prirodna obnova u roku od dvije godine, koja bi bila u skladu sa šumsko uzgojnim ciljem, pošumljavanje se vrši sadnjom ili sjetvom sjemena drveća koje odgovaraju staništu. U svrhu pošumljavanja koristi se samo materijal za reprodukciju potvrđenog porijekla.

(3) Površine predviđene za pošumljavanje i prirodnu obnovu moraju biti obilježene na terenu i ucrtane na karti odgovarajuće razmjere.

Član 23. (Šumski materijal za reprodukciju)

(1) Federalna uprava vodi registre objekata za proizvodnju i doradu šumskog sjemena i sadnog materijala šumskog i hortikulturnog drveća i grmlja.

(2) Uvoz šumskog reproduccionog materijala moguć je samo na osnovu rješenja kojim se odobrava uvoz, koju izdaje Federalno ministarstvo na osnovu mišljenja Federalne uprave. Rješenje se izdaje samo ako je šumski reproduccioni materijal potvrđenog porijekla i ako ga trenutno nema na domaćem tržištu ili ako služi u naučno-istraživačke svrhe.

(3) Protiv rješenja iz stava 2. ovog člana nije dozvoljena žalba ali se može pokrenuti upravni spor pred nadležnim sudom.

C. Zaštita protiv biotičkih i nebiotičkih agensa

Član 24. (Opšte preventivne mjere)

(1) Opšte dugoročne preventivne mjere protiv biotičkih i nebiotičkih agensa, koji bi mogli ugroziti stabilnost šuma i njihove funkcije, zasnivaju se na gospodarenju šumama, koje uvažava prirodne procese, kao i na održavanju i odgovarajućem unapređenju diverziteta šumskih ekosistema.

(2) Principi i mjere kojima se obezbjeđuje trajnost gospodarenja šumama i održavanje i unapređenje diverziteta šumskih ekosistema određuju se u Šumarskom programu Federacije, a detaljnije se razrađuju u šumsko privrednim osnovama.

(3) Staništa od posebnog značaja posmatrana sa gledišta diverziteta šumskih ekosistema koja su određena u šumsko privrednim osnovama moraju biti očuvana.

Član 25. (Sanitarne sječe, šumski red i druge preventivne mjere)

(1) Korisnik šuma i vlasnici privatnih šuma provode ili obezbjeđuju provođenje sanitarne sječe prije nego što bi se šume mogle ugroziti prekomjernim razmnožavanjem insekata, širenjem uzročnika biljnih bolesti ili drugih štetnih organizama. U privatnim šumama kantonalna uprava obezbjeđuje sanitarne sječe ukoliko vlasnici šuma ne mogu sami provesti sanitarnu sječu.

(2) Mrtva i zaražena neposječena stabla, pojedinačna ili u malim grupama, ne moraju biti posječena u kontekstu sanitarne sječe ako se mogu smatrati obogaćenjem šumskog biodiverziteta i ne predstavljaju ozbiljnu prijetnju sastojinama. Korisnik šuma i vlasnici privatnih šuma koji su odgovorni da obezbijede sanitarnu sječu i nadležni šumarski inspektor će tražiti mišljenje od kantonalne uprave ukoliko nije jasan stepen opasnosti.

(3) Korisnik šuma i vlasnik privatnih šuma obezbjeđuju izvođenje sljedećih mjera zaštite šuma:

- a) postavljanje, osmatranje i održavanje feromonskih klopki i postavljanje lovnih stabala za potkornjake;
- b) sanaciju šumskih područja nakon elementarnih nepogoda i prenamnoženja štetočina;
- c) guljenje kore ili tretiranje panjeva i drugih dijelova drveta četinara i brijesta koje predstavlja poseban rizik za razmnožavanje parazita, širenja uzročnika biljnih bolesti i štetočina kroz upotrebu kemijskih sredstava za tretiranje u skladu sa ovim zakonom;
- d) uspostavljanje i održavanje šumskog reda.

(4) Pod šumskim redom iz stava 3. tačka d) ovog člana smatra se preduzimanje mjera za sprječavanje pojave požara, štetnih insekata i biljnih bolesti, štetnog djelovanja vjetrova, snijega i drugih nepogoda, oštećivanje stabala i podmlatka i zagađivanje voda prilikom sječe i izvoza drveta.

(5) Kantonalna uprava:

- a) prikuplja sve podatke značajne za zaštitu šuma koje dostavljaju odgovorna lica iz stava 3. ovog člana;
- b) obezbjeđuje informacije o pojavi biljnih bolesti i štetočina i
- c) savjetuje o pitanjima koja se tiču integralne zaštite šuma.

(6) Kantonalni ministar naređuje dodatne mjere za zaštitu šume ako kantonalna uprava ustanovi da je biološka ravnoteža poremećena do takvog stepena da nije moguća njena obnova sa mjerama propisanim u ovom članu ili ako postoji opasnost od drugog velikog oštećenja.

(7) Rad u šumama mora biti izveden u odgovarajućoj sezoni, na način koji smanjuje pojavu šteta po šumski ekosistem.

(8) Federalni ministar donosi pravilnik kojim se propisuje obim mjera za uspostavljanje i održavanje šumskog reda i način njihovog provođenja.

Član 26.

(Obnova šuma nakon nepogode)

(1) U slučaju nepogode u šumi uzrokovane bilo kojim biotičkim ili nebiotičkim uticajima, uključujući i šumske požare, korisnici šuma u saradnji sa kantonalnom upravom, pripremaju plan za obnovu oštećenih i uništenih šuma i šumskog zemljišta. Plan sadrži opis nepogode, stepen oštećenja šume, mjere koje se trebaju provesti i troškove sanacije i obnove.

(2) Ako troškovi za obnovu iz stava 1. ovog člana prelaze finansijski potencijal korisnika/vlasnika šuma u kombinaciji sa dostupnim finansijskim sredstvima za šume iz budžeta jedinice lokalne samouprave, budžeta kantona i Budžeta Federacije BiH, Vlada Federacije BiH će obezbijediti posebna sredstva kako bi se omogućila primjena plana.

D. Promet drveta i nedrvnih šumskih proizvoda

Član 27.

(Promet drveta i nedrvnih šumskih proizvoda)

(1) Drvo, dijelove stabala i grane posječene u šumi i izvan šume (na poljoprivrednom zemljištu, međama, pojedinačna stabla i sl.), nije dozvoljeno pomjerati od panja dok se ne obilježi šumskim čekićem (žigoše), obrojči, premjeri i evidentira. Zabranjeno je iste stavljati u promet dok se ne izda otpremni iskaz.

(2) Žigosanje, obrojčavanje, premjeravanje, evidentiranje i izdavanje otpremnog iskaza za drvo koje potiče iz državne šume vrši korisnik šuma, a za drvo iz privatnih šuma i izvan šume (na poljoprivrednom zemljištu, međama, pojedinačna stabla i sl.) kantonalna uprava ili pravno lice za obavljanje stručnih poslova u privatnim šumama.

(3) Nedrvne šumske proizvode iz člana 39. ovog zakona nije dozvoljeno stavljati u promet bez odobrenja korisnika šuma ili vlasnika privatne šume.

(4) Pod prometom drveta i nedravnih šumskih proizvoda, u smislu ovog zakona, podrazumjeva se prevoz prometnicama, kupovina, prodaja, poklon, skladištenje kao i primanje drveta u prerađivačke kapacitete u kojima se vrši prerada drveta.

(5) Licu koje se zatekne u izvršenju radnji suprotno odredbama ovog člana ili koje izvrši sječu šume na uzurpiranom državnom i zemljištu na kome imovinsko pravni odnosi nisu riješeni i lice koje izvrši sječu bez prethodne doznake i prije žigosanja, obrojčavanja i snabdijevanja drveta sa otpremnim iskazom i koje stavi u promet nedrvne šumske proizvode u suprotnosti sa odredbama ovog člana, kaznit će se novčanom kaznom i izreći će mu se zaštitna mjera oduzimanja drveta, odnosno nedravnih šumskih proizvoda, kao i sredstava kojim je izvršena nezakonita radnja, a licu koje dozvoli vršenje radnji suprotno odredbama ovog člana izreći će se novčana kazna.

(6) Privremeno oduzimanje drveta i nedravnih šumskih proizvoda (zapljena) koji su stavljani u promet u suprotnosti sa odredbama ovog člana vrše čuvari šuma, pripadnici policije i nadležni šumarski inspektori, dok privremeno oduzimanje sredstava kojima je izvršena nezakonita radnja vrše pripadnici policije u skladu sa važećim propisima koji se odnose na krivičnu, odnosno prekršajnu odgovornost. Privremeno oduzeti šumski proizvodi pohranjuju se na mjestu koje odredi kantonalna uprava. U slučaju da postoji mogućnost da se u toku pohranjivanja šumskim proizvodima umanju vrijednost, zaplijenjenu robu licitacijom će prodati kantonalna uprava.

(7) Lica iz stava 6. ovog člana imaju pravo legitimisati sva lica koja se kreću na području šume koju čuvaju, odnosno nad kojom vrše nadzor.

(8) U periodu vegetacije, od 1. aprila do 1. novembra, drvo četinara i brijesta ne može se sa korom stavljati u promet i uskladištavati.

(9) Izuzetno od stava 8. ovog člana drvo četinara i brijesta može se sa korom stavljati u promet ako period od sječe do otpreme traje kraće od ciklusa razvoja insekta, a najduže 21 dan.

(10) Federalni ministar, po prethodno pribavljenom mišljenju federalnog ministra trgovine, donosi pravilnik kojim se propisuje način žigosanja, obrojčavanja, premjeravanja, sadržaj i način izdavanja otpremnog iskaza za drvo, koje potiče iz državnih i privatnih šuma sa teritorije Federacije, kao i način vođenja evidencija, obilježavanja i izdavanja dokumentacije za drvne sortimente u unutrašnjem prometu, trgovini između trećih lica kao i prometu drvnih sortimenata iz uvoza.

(11) Pravna i fizička lica koja nanesu štetu šumama i šumskom zemljištu po bilo kojem osnovu dužni su vlasniku šume i šumskog zemljišta nadoknaditi štetu prema odštetnom cjenovniku.

(12) Federalni ministar donosi odštetni cjenovnik iz stava 11. ovog člana.

III. ŠUME I ŠUMSKO ZEMLJIŠTE S POSEBNIM REŽIMOM GOSPODARENJA – ZAŠTIĆENE ŠUME

A. Zaštitne šume i šume s posebnom namjenom

Član 28. (Opći principi)

(1) Da bi se obezbijedila njihova zaštita ili poseban režim gospodarenja, određene šume mogu biti proglašene zaštitnim šumama ili šumama s posebnom namjenom. Njima će se gospodariti na način koji će obezbijediti namjenu zbog koje su proglašene.

(2) Procjena funkcija zaštitnih šuma i šuma s posebnom namjenom utvrđuje se stručnim šumarskim elaboratom sa podacima o stanju šuma i principima gospodarenja šumama u cilju očuvanja šuma i ostvarivanja namjene proglašenja područja, a koristi se za proglašenje iz stava 1. ovog člana.

(3) Šume koje predstavljaju dio područja zaštićenog propisom donesenim u skladu sa drugim zakonom Federacije, koji također propisuje poseban režim gospodarenja za šume, smatraju se šumama s posebnom namjenom i za iste će se primjenjivati odredbe ovog zakona.

(4) Način gospodarenja i obnove šuma unutar zaštićenog područja propisuje se programom za gospodarenje šumama koji se donosi na osnovu akta o njihovom proglašenju i sastavni je dio plana upravljanja zaštićenim područjem. Upravitelj zaštićenog područja donosi program gospodarenja šumama posebne namjene unutar zaštićenih područja koji izrađuje Federalna uprava, a može ga provoditi pravna osoba registrovana za obavljanje poslova u šumarstvu.

(5) Troškove gospodarenja šumama s posebnim režimom gospodarenja unutar zaštićenog područja snosi pravno lice na čiji je zahtjev proglašenje izvršeno odnosno pravno lice kojem je zaštićeno područje dodijeljeno na upravljanje.

(6) Kontrolu provođenja programa gospodarenja šumama posebne namjene na područjima zaštićenim po osnovu propisa o zaštiti prirode i okoliša vrši kantonalna uprava.

(7) Propis kojim se šume proglašavaju zaštitnim šumama ili šumama s posebnom namjenom određuje režim gospodarenja takvim šumama i pravno lice koje je odgovorno za obezbjeđenje sredstava za pokriće troškova vezanih za posebni režim gospodarenja.

(8) Vlasnik privatne šume i korisnik državne šume imaju pravo na naknadu za njeno ograničeno korištenje ili povećane troškove gospodarenja. Naknadu snosi lice na čiji je zahtjev proglašenje izvršeno odnosno pravno lice kojem je zaštićeno područje dodijeljeno na upravljanje. Visina naknade se utvrđuje sporazumno, a ako se sporazum ne postigne naknada se utvrđuje kod nadležnog suda.

(9) Zaštitne šume i šume s posebnom namjenom moraju se ucrtati na kartu i na terenu obilježiti vidljivim znakovima koji se odrede u propisu o proglašenju šume. Šume će biti predmet nadzora kantonalne uprave i nadležnog šumarskog inspektora bez obzira na tijelo koje je izvršilo proglašenje. Obilježavanje šuma vrši pravna osoba koja upravlja zaštićenim područjem. Troškove obilježavanja snosi pravno lice na čiji je zahtjev šuma proglašena zaštitnom, odnosno šumom sa posebnom namjenom.

(10) Federalno ministarstvo na osnovu podataka koje mu dostavljaju kantonalna ministarstva, vodi evidenciju zaštitnih šuma i šuma sa posebnom namjenom.

(11) Federalni ministar, po prethodno pribavljenom mišljenju federalnog ministra okoliša i turizma, donosi pravilnik kojim se propisuje način izrade, sadržaj i postupak odobrenja i revizije programa gospodarenja zaštitnim šumama i šumama posebne namjene.

Član 29. (Zaštitne šume)

(1) Zaštitne šume su:

- a) šume koje prvenstveno služe za zaštitu zemljišta na strmim terenima i zemljišta podložnih erozijama, bujicama, klizištima ili ostrim klimatskim uslovima koji ugrožavaju postojanje samih šuma;
- b) šume čiji je glavni zadatak zaštita naselja, privrednih i drugih objekata kao što su saobraćajnice, energetske objekti, objekti telekomunikacione infrastrukture, zaštita izvorišta i korita vodotoka, obale vodenih akumulacija kao i šume koje su podignute kao zaštitni pojasevi, odnosno koje služe protiv prirodnih nepogoda, katastrofa ili stihijskih efekata ljudskog djelovanja.

(2) Zaštitne šume iz stava 1. ovog člana proglašava vlada kantona na prijedlog kantonalnog ministarstva ili jedinice lokalne samouprave uz prethodno pribavljeno mišljenje kantonalne uprave. Kada prijedlog podnosi kantonalno ministarstvo potrebno je pored mišljenja kantonalne uprave prethodno pribaviti i mišljenje jedinice lokalne samouprave. Kada prijedlog podnosi jedinica lokalne samouprave potrebno je pored mišljenja kantonalne uprave prethodno pribaviti i mišljenje kantonalnog ministarstva.

(3) Zaštitne šume iz stava 1. ovog člana, ukoliko se radi o zaštiti objekata od značaja za Federaciju BiH, proglašava Vlada Federacije BiH na prijedlog Federalnog ministarstva uz prethodno pribavljeno mišljenje Federalne uprave.

(4) Primjerak akta o proglašenju zaštitne šume obavezno se dostavlja Federalnom ministarstvu, kantonalnom ministarstvu, nadležnoj instituciji za zaštitu kulturno historijskog i prirodnog naslijeđa, Federalnoj upravi i jedinici lokalne samouprave.

Član 30. (Šume s posebnom namjenom)

(1) Za šume sa posebnom namjenom smatraju se:

- a) šume unutar zaštićenih područja ili prirodnih vrijednosti zaštićene na osnovu propisa o zaštiti prirode;
- b) šume od posebnog značaja za odbranu i potrebe Oružanih snaga Bosne i Hercegovine;
- c) šume ili njeni dijelovi registrovani kao sjemenske sastojine i sjemenski objekti;
- d) šume od značaja za snabdjevanje vodom i očuvanje njenog kvaliteta zaštićene na osnovu propisa o vodama;
- e) šume namjenjene za izletišta, odmor, opće obrazovanje, rekreaciju, turizam, klimatska i druga lječilišta.

(2) Šume iz stava 1. tačka c) ovog člana proglašava Federalno ministarstvo u skladu sa odredbama Zakona o sjemenu i sadnom materijalu šumskih i hortikulturnih vrsta drveća i grmlja („Službene novine Federacije BiH“, br. 71/05 i 8/10).

(3) Prije donošenja akata o proglašenju iz stava 1. tačke b) potrebno je pribaviti mišljenje Federalne uprave i jedinice lokalne samouprave. Prije donošenja akata o proglašenju iz stava 1. tč. a), d) i e), potrebno je pribaviti mišljenje kantonalne uprave i jedinice lokalne samouprave.

(4) Primjerak akta o proglašenju iz stava 1. tč. a), b), d) i e) obavezno se dostavlja Federalnom ministarstvu, kantonalnom ministarstvu, nadležnoj instituciji za zaštitu kulturno-historijskog i prirodnog naslijeđa, Federalnoj upravi i jedinici lokalne samouprave.

Član 31. **(Zahtjev za izdavanje mišljenja)**

Zahtjev za izdavanje mišljenja iz čl. 29. st. 2 i 3. i 30. stav 3. ovog zakona, odnosno proglašenje šuma sa posebnim režimom gospodarenja koji podnosi zainteresovana institucija ili pravno lice obavezno sadrži sljedeće:

- a) cilj i razloge zbog kojih se predlaže proglašenje šuma sa posebnim režimom gospodarenja;
- b) općinu, naziv katastarske općine, broj zemljišnoknjižnog uloška i broj katastarske parcele, kao i naziv šumsko gospodarske jedinice, broj odjela i oznaku odsjeka;
- c) digitaliziranu kartu razmjere 1:10.000 (za manja područja razmjera 1:5.000), sa ucrtanim parcelama za koju se traži proglašenje zaštitne šume odnosno šume sa posebnom namjenom;
- d) stručni šumarski elaborat sa podacima o stanju šuma i principima gospodarenja šumama u cilju očuvanja šuma i ostvarivanja namjene proglašenja područja zaštite;
- e) procjenu okolišnog uticaja za šume iz člana 30. stav 1. tačka b);
- f) predložena ograničenja u gospodarenju;
- g) predložene naknade ukoliko one dođu u obzir;
- h) saglasnost jedinice lokalne samouprave i
- i) odgovarajuće administrativne mjere uključujući javne obavijesti i rasprave.

B. Šume na kršu i pošumljavanje

Član 32. **(Šume na kršu)**

(1) Šume na kršu bitno smanjene produktivnosti i šumska zemljišta na kršu, zbog svojih specifičnosti klasifikuju se kao područja sa posebnim režimom gospodarenja, te imaju finansijsku podršku Federacije, kantona i jedinice lokalne samouprave.

(2) Šume i šumska zemljišta na kršu klasifikuju se kao područja velike opasnosti od šumskih požara.

Član 33.
(Pošumljavanje krša i goleti)

(1) Pošumljavanje krša i goleti vrši se prema planu za pošumljavanje koji naročito sadrži sljedeće:

- a) površine koje će se pošumljavati, naziv šumsko privrednog područja, gospodarske jedinice, broj odjela i oznaku odsjeka;
- b) saglasnost vlasnika zemljišta;
- c) analizu prirodnih karakteristika staništa, naročito u smislu tla i klimatskih uslova;
- d) izbor vrsta drveća, posebne karakteristike sadnica i opis razloga za njihov izbor;
- e) gustoću, način i tehniku sadnje;
- f) troškove sadnje i troškove održavanja pošumljenog područja za period od najmanje pet godina;
- g) procjenu funkcija koje će tek zasađene šume obavljati u tim predjelima;
- h) mjere zaštite od požara.

(2) Za monokulture četinara koje zauzimaju više od pet hektara zemljišta obavezna je procjena okolišnog uticaja.

Član 34.
(Procjena okolišnog uticaja)

Procjena okolišnog uticaja je obavezna za podizanje monokultura na površini većoj od pet hektara i za prevođenje šumskog zemljišta drugoj namjeni iz člana 61. ovog zakona, u skladu sa propisima o zaštiti okoliša.

IV. OČUVANJE I ZAŠTITA ŠUMA I NJIHOVIH FUNKCIJA

A. Zaštita šuma i šumskog zemljišta od šteta

Član 35.
(Zaštita šuma od požara)

(1) U šumama i na šumskom zemljištu kao i na drugom zemljištu na udaljenosti do 150 m od šume nije dozvoljeno loženje otvorene vatre.

(2) Izgradnja i rad fabrika i drugih objekata koji rade sa otvorenim plamenom je zabranjena na udaljenosti manjoj od 300 metara od granice šume.

(3) Izuzev od stava 1. ovog člana, vatra u šumama i na šumskom zemljištu može se ložiti samo na mjestima određenim i obilježenim od strane kantonalne uprave uz pridržavanje propisanih uslova i mjera bezbjednosti.

(4) U šumama i na šumskim zemljištima namjenjenim za izletišta, u dane praznika i druge neradne dane, kantonalna uprava je dužna obezbijediti dežurnu čuvarsku službu.

(5) Kantonalna uprava klasifikuje šume i šumsko zemljište po stepenu opasnosti od šumskih požara. Područja u kojima opasnost od šumskog požara predstavlja ozbiljnu prijetnju ekološkoj ravnoteži ili bezbjednosti ljudi i stvari, klasifikuju se kao područja velike opasnosti. Područja gdje opasnost od požara nije

stalna ili ciklična ali predstavlja značajnu prijetnju šumskim ekosistemima klasifikuju se kao područja srednje opasnosti.

(6) Korisnici šuma u saradnji sa kantonalnom upravom i nadležnim organom civilne zaštite, izrađuju planove za zaštitu šuma od požara. Korisnici šuma obavezni su provoditi ove planove i redovno izvještavati kantonalnu upravu o izvršavanju mjera za zaštitu od požara.

(7) Korisnici šuma i vlasnici privatnih šuma dužni su da redovno obavještavaju kantonalnu upravu i općinski organ nadležan za poslove civilne zaštite o svim požarima u šumama i na šumskom zemljištu. Radi poboljšanja nadzora nad šumskim požarima i njihovim uzrocima, učincima i prevenciji Federalna uprava vodi jedinstven informacioni sistem i registar o šumskim požarima za teritorij Federacije na osnovu podataka koje joj dostavljaju kantonalne uprave.

(8) Federalna uprava objavljuje karte teritorija prema stepenu opasnosti od šumskih požara.

(9) Federalni ministar pravilnikom propisuje sadržaj planova za zaštitu od požara, način prikupljanja podataka, vođenje registra šumskih požara, uslove korištenja podataka i izgled obrasca na kojem se izvještava o šumskim požarima.

Član 36.

(Hemijska sredstva i odlaganje otpada)

(1) Upotreba hemijskih sredstava nije dozvoljena u šumi i na šumskom zemljištu.

(2) Izuzev od stava 1. ovog člana, hemijska sredstva čija upotreba je dozvoljena od strane nadležnog organa, pod uslovom da ne ugrožavaju biološku ravnotežu, mogu biti korištena u šumskim rasadnicima i u šumama za zaštitu biljaka od divljači i od korova, za smanjenje prekomjerne populacije insekata čiji broj ne može biti smanjen ni na koji drugi način, te za gašenje šumskih požara.

(3) Kantonalno ministarstvo uz prethodnu saglasnost nadležnog ministarstva okoliša izdaje dozvolu za iznimnu upotrebu hemijskih sredstava iz stava 2. ovog člana u kojoj se propisuje način upotrebe. Vremenski rok za izdavanje dozvole za smanjenje prekomjerne populacije insekata je pet dana od pribavljanja prethodne saglasnosti.

(4) Nije dozvoljeno odlagati otpad, smeće ili zagađujuće tvari u šumi ili na šumskom zemljištu.

(5) Korisnik državnih šuma obavezan je ukloniti otpad i smeće iz državnih šuma, a vlasnik privatne šume obavezan je ukloniti otpad i smeće iz šume u njegovom vlasništvu. Korisnik šuma ima pravo na naknadu za nastale troškove uklanjanja otpada i smeća od fizičkog ili pravnog lica koji su otpad, smeće ili zagađujuće tvari deponovali u državnoj šumi.

Član 37.

(Pašarenje)

(1) Paša, žirenje, brst, kresanje grana i lisnika (u daljem tekstu: pašarenje) u šumama nije dozvoljeno.

(2) Izuzev od stava 1. ovog člana korisnici šuma i vlasnici privatnih šuma mogu prema dogovorenoj naknadi dozvoliti pašarenje na površinama koje su određene u šumsko privrednoj osnovi. Pašarenje se može dozvoliti samo pod uslovom da je stoka pod nadzorom čuvara stoke.

(3) Pristup stoke na pašu i pojlja kroz šume dozvoljen je samo putem kojeg odredi korisnik šuma i vlasnik privatne šume.

(4) Pašarenje u šumama neće se dozvoliti ako bi se time ugrozio biodiverzitet, odnosno flora, fauna i gljive zaštićene prema propisima o zaštiti prirode.

(5) Federalni ministar donosi pravilnik kojim se propisuju uslovi pod kojim se vrši pašarenje.

Član 38. **(Praćenje zdravstvenog stanja šuma)**

(1) Kantonalna uprava i korisnici šuma prate zdravstveno stanja šuma i obim šteta u šumama, te o tome izvještavaju Federalnu upravu, jedinice lokalne samouprave i javnost.

(2) Federalni ministar donosi pravilnik kojim se određuje način praćenja zdravstvenog stanja šuma.

B. Nedrvni šumski proizvodi

Član 39. **(Korištenje nedrvnih šumskih proizvoda)**

(1) Korisnik šuma i vlasnik privatnih šuma mogu uzgajati i iskorištavati nedrvne šumske proizvode iz člana 4. tačka 21. alineje b), c), d), e), f), g) i j) ili odobriti drugim pravnim i fizičkim licima njihovo iskorištavanje u obimu i na mjestima koja su određena šumsko privrednom osnovom.

(2) U šumi i na šumskom zemljištu zabranjeno je iskorištavanje humusa, gline, treseta, zemlje, pijeska, šljunka i kamena sa površine zemlje kao i skidanje kore sa drveća i bušenje stabala, uklanjanje iz šume grana i drugih ostataka drveta od sječe kao i ostalih organskih materija koje su neophodne za poboljšanje plodnosti tla.

(3) Izuzev od stava 2. ovog člana korisnik šuma i vlasnik privatnih šuma mogu za svoje potrebe iskorištavati šumske proizvode iz stava 2. ovog člana ukoliko je to predviđeno šumsko privrednom osnovom.

(4) Korisnik šuma može za vlastite potrebe koristiti mineralne sirovine na lokalitetima predviđenim šumsko privrednom osnovom i godišnjim planovima realizacije šumsko privredne osnove u svrhu izgradnje i održavanja šumskih puteva.

(5) Ako korisnik šuma planira koristiti mineralne sirovine u komercijalne svrhe dužan je postupiti u skladu sa odredbama Zakona o rudarstvu („Službene novine Federacije BiH“, broj 26/10) i odredbama člana 62. ovog zakona.

(6) Korisnik šuma dužan je do 28. februara tekuće godine za prethodnu godinu kantonalnoj upravi dostaviti podatke o vrsti i količini nedrvnih šumskih proizvoda koji su prikupljeni na području kojim gospodari, a kantonalna uprava je dužna u roku od deset dana ove podatke prosljediti Federalnoj upravi.

(7) Korištenje nedrvnih šumskih proizvoda neće se dozvoliti ako bi se time ugrozio diverzitet šumskih ekosistema, odnosno flora, fauna i gljive zaštićene prema propisima o zaštiti prirode.

(8) Federalni ministar donosi pravilnik kojim se propisuju uslovi za uzgoj, iskorištavanje, sakupljanje i promet nedrvnih šumskih proizvoda.

Član 40. **(Divljač u šumi)**

(1) Vrste divljači i njihovo brojno stanje u šumama moraju obezbjediti biološku ravnotežu i ne smiju ugroziti druge članove ekosistema ili spriječiti ostvarivanje ciljeva gospodarenja šumama. Unošenje pojedinih vrsta divljači u šume i na šumska zemljišta mora obezbjediti njihov opstanak i ne smije ugroziti druge organizme na staništu.

(2) Korisnik lovišta dužan je pričinjene štete i oštećenja koja je prouzrokovala divljač u šumi nadoknaditi korisniku šuma i vlasniku privatnih šuma u skladu sa odredbama Zakona o lovstvu („Službene novine Federacije BiH“, br. 4/06 i 8/10).

C. Zaštita ugroženih vrsta

Član 41. **(Ugrožene vrste)**

(1) Nije dozvoljena sječa, iskorjenjivanje ili bilo kakvo oštećivanje sljedećih vrsta drveća i grmlja: Pančičeve omorike (*Picea omorika* (Pančić) Purk.), tise (*Taxus baccata* L.), mečje lijeske (*Corylus colurna* L.), planinskog javora (*Acer heldreichii* Orph.), planinskog bora (*Pinus mugo* Turra), zelene johe (*Alnus viridis* (Chaix) Lam. & DC.), munike (*Pinus heldreichii* Christ.), zanovijeti (*Petteria ramentacea* (Sieber) Presl), božikovina (*Ilex aquifolium* L.), lovorolisni likovac (*Daphne laureola* L.), meka veprina (*Ruscus hippoglossum* L.), maljavi planiski sleč (*Rhododendron hirsutum* L.), žuta koščela (*Celtis tournefortii* Lamk.), Vebijev badem (*Prunus webii* (Spach.) Vierh.), hrvatska sibireja (*Sibiraea altaiensis* var. *croatica* (Degen) Beck.), Turinška mukinja (*Sorbus x thuringiaca* (Nyman) Schonach), obični negnjil (*Laburnum anagyroides* Medik.), Blagajev likovac (*Daphne blagayana* Freyer), širokolisna mukinja (*Sorbus latifolia* Pers.), Šnajderov hrast (*Quercus schneideri* Vierh.), makedonski hrast (*Quercus trojana* Webb.) i sremza (*Prunus padus* L.).

(2) Izuzetno, ukoliko su potrebne uzgojne i sanitarne sječe drveća i grmlja iz stava 1. ovog člana, zahtjev za odobravanje sječe podnosi se kantonalnoj upravi, koja nakon uviđaja na terenu izdaje rješenje i dostavlja ga podnosiocu zahtjeva i nadležnoj šumarskoj inspekciji. Sječa se može odobriti samo ako su stabla vrsta iz stava 1. ovog člana suha ili toliko oštećena da im predstoji neposredno sušenje ili predstavljaju leglo zaraze od biljnih bolesti i štetočina, kao i radi sprovođenja mjera njege, obnove i zaštite genofonda ovih vrsta u zasadima i prirodnim šumama i drugim slučajevima u skladu sa propisom o zaštiti ugroženih vrsta.

(3) Protiv rješenja iz stava 2. ovog člana može se izjaviti žalba Federalnom ministarstvu u roku od 15 dana od dana prijema rješenja.

D. Saobraćaj u šumama

Član 42. **(Izgradnja i održavanje šumske infrastrukture)**

(1) Šumska infrastruktura služi prvenstveno za potrebe gospodarenja šumama i sastavni je dio šume.

(2) Planiranje, izgradnja i održavanje šumske infrastrukture obavlja se uz poštivanje tehničkih, gospodarskih i ekoloških uslova, šumskog tla, vegetacije, divljači i uz njihovu maksimalnu zaštitu.

(3) Pri planiranju i izgradnji šumske infrastrukture potrebno se prilagoditi prirodnom okolišu te uvažavati potrebe lokalne zajednice, kao i protupožarne, turističke i rekreativne potrebe.

(4) Šumska infrastruktura mora biti izgrađena, održavana i korištena na način da isključuje:

- a) ugrožavanje izvora vode;
- b) pojavu erozivnih procesa;
- c) sprječavanje toka površinskih i podzemnih voda;
- d) narušavanje ravnoteže nestabilnog tla i povećanje rizika od klizišta;
- e) uticaj na područja koja su važna za opstanak divljih životinja i biološku raznolikost;
- f) uticaj na prirodno i kulturno naslijeđe;
- g) ugrožavanje ostalih funkcija ili višenamjensku upotrebu šume.

(5) Šumski kamionski put se može graditi nakon što se izradi projekat za njegovu izgradnju i pribavi saglasnost kantonalne uprave.

(6) Korisnik šuma, u skladu sa odredbama ovog zakona i šumsko privredne osnove, gradi, održava i nadgleda šumsku transportnu infrastrukturu i promet na istoj.

(7) Korisnik šuma dostavlja podatke neophodne za uspostavljanje i vođenje katastra šumske infrastrukture kantonalnoj upravi koja jedna primjerak iste dostavlja Federalnoj upravi i jedinici lokalne samouprave.

Član 43. **(Saobraćaj u šumama)**

(1) Nije dozvoljeno kretanje motornih vozila u šumama i na šumskim putevima osim u svrhu gospodarenja šumama i nadzora, spašavanja, policijskih istraga, vojnih manevara, mjera za zaštitu od prirodnih katastrofa, te pristupa vlasnika, korisnika šuma i pojedinaca zemljištu za koje su odgovorni, kao i lokalnog stanovništva.

(2) Vlasnik i korisnik šuma i šumskog zemljišta mogu dozvoliti kretanje šumskim putem trećem licu po dogovoru koji može uključivati određenu naknadu. Za organizovanje biciklističkih i moto trka šumskim putem potrebno je pribaviti dozvolu korisnika/vlasnika.

(3) Bicikli se mogu koristiti na šumskim putevima širim od dva metra.

(4) Šteta na šumskim putevima učinjena od strane drugih korisnika mora biti nadoknađena vlasnicima šuma i korisniku šuma.

Član 44. **(Pristup šumama)**

(1) Sva lica imaju pravo kretati se kroz šumu ili šumskim zemljištem u cilju rekreacije, ako nije drugačije određeno ovim ili nekim drugim federalnim zakonom. Sva lica koja ovako koriste šumu ili šumsko zemljište to rade na vlastitu odgovornost. Korisnik odnosno vlasnik šume nisu obavezni preduzeti posebne mjere predostrožnosti prema posjetiocima šuma niti će se smatrati odgovornim za bilo kakve štete ili povrede koje pretrpe takva lica.

(2) Bez odobrenja korisnika ili vlasnika privatne šume zabranjeno je:

- a) razapinjati šator ili postavljati logor u šumi;
- b) smještati pčelinjake;
- c) sakupljati nedrvne šumske proizvode u količini koja prelazi 1 kg;
- d) ulaziti u fizički i znakovima označena šumska područja i zatvorene šumske ceste;
- e) ulaziti u područja, šumske ceste ili izletišta gdje se vrši sječa;
- f) ulaziti u područja prirodne obnove, pošumljena područja i šumske rasadnike i ulaziti u predjele i infrastrukturu koja je namijenjena za lov.

(3) Postavljanje ograda unutar šume je dozvoljeno samo u mjeri koja je neophodna za odgovarajuće radove gospodarenja šumama, zaštite i uzgoja divljači, sprečavanja štete od divljači i ni u kom slučaju neće ozbiljno remetiti pristup šumama i šumskom zemljištu.

V. UPRAVLJANJE ŠUMAMA, KATASTAR ŠUMA I EKONOMSKE FUNKCIJE ŠUMA

A. Upravljanje šumama

Član 45. (Državne i privatne šume)

(1) Šume i šumsko zemljište su u vlasništvu države (u daljem tekstu: državne šume) i u vlasništvu fizičkih i pravnih lica (u daljem tekstu: privatne šume).

(2) Državne šume su u vlasništvu Federacije BiH.

Član 46. (Upravljanje državnim šumama)

(1) U ostvarivanju prava po osnovu vlasništva, nad šumom i šumskim zemljištem u državnom vlasništvu, Federaciju zastupa Federalno ministarstvo.

(2) Državnim šumama i šumskim zemljištima upravljaju Federalno ministarstvo i kantonalno ministarstvo pod uslovima utvrđenim ovim zakonom.

Član 47. (Sticanje vlasništva)

(1) Pravo vlasništva nad državnim šumama i šumskim zemljištima ne može se steći njihovim korištenjem ili zauzimanjem bez obzira na period trajanja istog, odnosno dosjelošću.

(2) Strana fizička i pravna lica ne mogu sticati pravo vlasništva na šumama i šumskim zemljištima.

Član 48.
(Provođenje prava i obaveza kantona)

(1) Kantonalno ministarstvo provodi prava i obaveze iz oblasti šumarstva na području kantona u skladu sa odredbama ovog zakona i propisa donesenih na osnovu ovog zakona.

(2) Kantonalno ministarstvo jednom godišnje dostavlja izvještaj vladi kantona o stanju šuma i šumskog zemljišta na području kantona.

Član 49.
(Zabrana zauzimanja)

(1) Zabranjeno je i kažnjivo svako neovlašteno zauzimanje državnih šuma i šumskog zemljišta.

(2) Neovlašteno zauzetu državnu šumu i šumsko zemljište bespravni korisnik dužan je napustiti odmah po prijemu naloga šumarskog inspektora ili čuvara šuma.

Član 50.
(Promet šuma)

(1) Zabranjen je promet državnih šuma i šumskih zemljišta. Svaki promet državnih šuma izvršen suprotno odredbama ovog zakona je nezakonit i takav ugovor je ništavan.

(2) Izuzev od odredaba stava 1. ovog člana promet državnih šuma može se vršiti samo u svrhu arondacije i komasacije.

(3) Državne šume ne mogu biti predmetom privatizacije.

(4) Federacija ima pravo prvenstva kupovine privatnih šuma koje su proglašene zaštitnim šumama ili šumama s posebnom namjenom.

(5) Federacija ima pravo prvenstva kupovine suvlasničkog dijela šume i šumskog zemljišta od vlasnika privatne šume ako je parcela u suvlasništvu sa državom.

(6) Strane pravne i fizičke osobe ne mogu sticati pravo vlasništva na šumama i šumskim zemljištem, osim ako međunarodnim ugovorom nije drugačije određeno.

Član 51.
(Utvrđivanje granica državnih šuma)

(1) Granice državnih šuma moraju na terenu biti obilježene vidnim i trajnim znakovima.

(2) Granice državnih šuma, koje nisu utvrđene, moraju se utvrditi u skladu sa materijalnim propisom kojim se uređuje oblast premjera i katastra nekretnina.

(3) Utvrđene granice iz stava 2. ovog člana moraju se ucrtati na katastarskim planovima i provesti kroz katastarski operat općinskog organa nadležnog za geodetske poslove.

(4) Poslove obilježavanja granica državnih šuma, čuvanja i održavanje graničnih znakova vrši kantonalna uprava.

(5) Federalni ministar donosi pravilnik o načinu obilježavanja granica državnih šuma, kao i vrsti i postavljanju graničnih znakova.

Član 52.

(Upravljanje privatnim šumama)

(1) Privatne šume, u smislu ovog zakona, su sve šume i šumsko zemljište za koje fizičko ili pravno lice dokumentima iz zemljišne knjige dokaže vlasništvo.

(2) Privatnim šumama upravljaju i gospodare njihovi vlasnici u skladu sa ovim zakonom, podzakonskim propisima i odredbama šumsko privredne osnove.

(3) Čuvanje privatnih šuma u nadležnosti je njihovih vlasnika.

(4) Vlasnik privatne šume ugovorom, uz naknadu, prenosi obavljanje stručnih poslova u šumarstvu, kantonalnoj upravi ili pravnom licu za obavljanje stručnih poslova u privatnim šumama.

(5) Naknada iz stava 4. ovog člana iznosi najviše 10% od cijene na panju posječenih šumskih drvnih sortimenata po cjenovniku šumskih proizvoda kantonalne uprave iz člana 4. tačka 13. ovog zakona.

(6) Pod stručnim poslovima iz stava 4. ovog člana podrazumjevaju se doznaka, primanje, premjeravanje, evidentiranje, izdavanje otpremnog iskaza, planiranje šumsko-uzgojnih radova, stručni nadzor, stručni savjetodavni poslovi i zaštita šuma.

(7) Kada vlasnik privatne šume ugovorom prenese obavljanje stručnih poslova kantonalnoj upravi, naknada se uplaćuje na namjenski račun budžeta kantona.

(8) Kantonalna uprava i pravna lica za obavljanje stručnih poslova u privatnim šumama dužni su voditi evidencije o izvršenim radovima i provedenim mjerama predviđenim kantonalnim šumsko-razvojnim planom, šumsko privrednom osnovom i projektom za izvođenje. Podaci predviđeni evidencijama moraju se evidentirati za proteklu godinu najkasnije do 01. februara tekuće godine. Pravna lica za obavljanje stručnih poslova u privatnim šumama dužni su kantonalnoj upravi dostaviti evidencije do 28. februara tekuće godine za prethodnu godinu.

(9) Za privatne šume projekat za izvođenje izrađuje se u skladu sa odredbama člana 14. ovog zakona i donosi ga kantonalna uprava ili pravno lice za obavljanje stručnih poslova u privatnim šumama na koje su preneseni stručni poslovi.

(10) Federalni ministar donosi pravilnik kojim se propisuje način i oblik vođenja registra evidencija za privatne šume iz stava 8. ovog člana.

B. Ekonomske funkcije šume

Član 53.

(Zaključivanje ugovora)

(1) Na području kantona posluje jedno kantonalno šumskoprivredno društvo (korisnik šuma).

(2) Odluku o osnivanju više kantonalnih šumskoprivrednih društava donosi skupština kantona uz prethodno pribavljeno mišljenje jedinice lokalne samouprave i nakon pribavljene saglasnosti Federalnog ministarstva koja se zasniva na stručnom elaboratu o opravdanosti njihovog formiranja koji može izraditi visokoškolska naučno-istraživačka ustanova iz oblasti šumarstva.

(3) Zahtjev sa elaboratom za formiranje više kantonalnih šumskoprivrednih društava Federalnom ministarstvu podnosi kantonalno ministarstvo, a konačnu

odluku o formiranju više kantonalnih šumskoprivrednih društava donosi skupština kantona. Jedinica lokalne samouprave može pokrenuti inicijativu kantonalnom ministarstvu za osnivanje novog kantonalnog šumsko privrednog društva.

(4) Minimalna teritorija kojom može gospodariti jedno šumskoprivredno društvo je šumskoprivredno područje. U sklopu šumskoprivrednog društva formiraju se organizacione jedinice za područje jedne ili više općina u skladu sa aktima društva.

(5) Na prijedlog kantonalnog ministarstva, Federalno ministarstvo ugovorom prenosi poslove gospodarenja državnim šumama korisniku šuma.

6) Prava, zadaci i odgovornosti iz stava 2. ovog člana koje Federalno ministarstvo ugovorom prenosi korisniku šuma pored ostalog sastoje se iz:

- a) realizacije šumsko privredne osnove putem godišnjih planova realizacije, izvršenje godišnjih planova gospodarenja ukoliko nije donešena šumsko privredna osnova i izrade i realizacije projekata za izvođenje;
- b) projektovanja, izgradnje, rekonstrukcije i održavanja šumske infrastrukture;
- c) prometa šumskih drvnih sortimenata i nedrvnih šumskih proizvoda;
- d) izvršavanja programa i planova biološke reprodukcije šuma propisanih šumsko privrednom osnovom;
- e) provođenja mjera zaštite šuma u skladu sa ovim zakonom;
- f) proizvodnje i prometa šumskog sjemena, šumskog i hortikulturnog sadnog materijala;
- g) izvršavanja planova korištenja nedrvnih šumskih proizvoda;
- h) realizacije planova razvoja šumarstva i mjera racionalizacije u šumarstvu;
- i) realizacije aktivnosti predviđenih izvedbenim dijelom Šumarskog programa Federacije i
- j) ostalih poslova, zadataka i odgovornosti u skladu sa ugovorom o prenosu poslova gospodarenja.

(7) Korisnik šuma obavezan je šumske drvne sortimente prodavati po tržišnim cijenama i na transparentan način, a u skladu sa Odlukom Vlade Federacije BiH o načinu prodaje šumskih drvnih sortimenata porijeklom iz državnih šuma na teritoriji Federacije Bosne i Hercegovine („Službene novine Federacije BiH“, br. 52/09 i 25/10), odnosno drugim propisom koji donosi Vlada Federacije BiH kojim se regulira način prodaje šumskih drvnih sortimenata.

(8) Vlada Federacije BiH donosi uredbu o načinu prodaje šumskih drvnih sortimenata porijeklom iz državnih šuma na teritoriji Federacije Bosne i Hercegovine.

(9) Korisnik šuma ne može prenositi na treća lica prava koja proističu po osnovu ugovora iz stava 5. ovog člana.

Član 54. **(Realizacija ugovornih obaveza)**

(1) Kantonalna uprava prati realizaciju ugovorenih obaveza iz člana 53. stav 6. ovog zakona i o tome izvještava Federalnu upravu, Federalno ministarstvo, kantonalno ministarstvo i jedinicu lokalne samouprave.

(2) Korisnici šuma dužni su voditi evidenciju o izvršenim radovima i provedenim mjerama predviđenim izvedbenim dijelom Šumarskog programa Federacije, kantonalnim šumsko-razvojnim planom, šumsko privrednom osnovom, godišnjim planom gospodarenja ukoliko nije donešena šumsko privredna osnova, godišnjim planom realizacije šumsko privredne osnove i projektom za izvođenje. Podaci predviđeni evidencijama moraju se evidentirati za proteklu godinu i dostaviti kantonalnoj upravi i Federalnoj upravi najkasnije do 28. februara tekuće godine za prethodnu godinu.

(3) Federalni ministar donosi pravilnik o načinu i obliku vođenja registra evidencija za državne šume iz stava 2. ovog člana.

Član 55. (Naknada za korištenje šuma)

(1) Visina naknade za korištenje državnih šuma iznosi 7 % od prihoda utvrđenog na osnovu odobrene godišnje količine sječe šumskih drvnih sortimenata računajući cijenu drveta na panju u skladu sa cjenovnikom i planiranog prihoda od prodaje nedrvnih šumskih proizvoda, a određuje se rješenjem kantonalne uprave iz člana 13. stav 3. ovog zakona.

(2) Kantonalna uprava do 31. decembra tekuće godine donosi rješenje o visini naknade za korištenje državnih šuma za narednu godinu.

(3) Protiv rješenja iz stava 2. ovog člana može se uložiti žalba Federalnom ministarstvu u roku od 15 dana od dana prijema rješenja.

(4) Korisnik šuma dužan je vršiti uplatu naknade za korištenje državnih šuma na način propisan odredbama člana 70. ovog zakona.

C. Katastar šuma

Član 56. (Katastar šuma)

(1) Korisnik šuma i pravno lice za obavljanje stručnih poslova u privatnim šumama ukoliko je obavljanje stručnih poslova za privatne šume preneseno ugovorom na njega, dužni su kantonalnoj upravi dostaviti katastar državnih i privatnih šuma najdalje do 31. marta tekuće godine za prethodnu godinu sa evidentiranim svim promjenama u toku godine.

(2) Po jedan primjerak izrađenog katastra šuma za područje kantona, kantonalna uprava dostavlja Federalnoj upravi.

(3) Federalni ministar donosi pravilnik kojim se propisuje način vođenja katastra šuma za državne i privatne šume.

D. Odnosi kod korištenja šuma

Član 57. (Prava trećih lica)

(1) Prava trećih lica na državnu šumu poštuju se ako su upisana u zemljišne knjige.

(2) Prava trećih lica mogu prestati uz odgovarajuću novčanu naknadu, nakon zahtjeva vlasnika šume.

(3) Zabranjeno je utvrđivati nova ili širiti postojeća prava trećih lica na državnu šumu, osim ako je to u skladu sa odredbama ovog zakona.

Član 58.
(Zaštita susjednih parcela)

(1) Prilikom gospodarenja šumom, vlasnik ili korisnik šume treba voditi dužnu pažnju o susjednim parcelama.

(2) Ako vlasnik ili korisnik šume, u procesu gospodarenja šumom, svojim aktivnostima vrši uticaj na susjedne parcele, obavezan je tražiti saglasnost vlasnika susjedne parcele prije nego započne tu aktivnost. Ako vlasnici susjednih parcela ne postignu sporazum, kantonalna uprava odlučuje o tome da li se ta aktivnost može provesti i u kom obliku, a naknada se utvrđuje sporazumno ili putem nadležnog suda.

Član 59.
(Korištenje parcela trećih lica)

(1) Vlasnik, odnosno korisnik šume i šumskog zemljišta, dužan je da dozvoli privremeni prijevoz ili smještaj šumskih proizvoda sa susjednih parcela na svom zemljištu ako to nije moguće izvršiti na drugi način ili ako bi drugi način bio nesrazmjerno skuplji.

(2) Korisnik prinudnog puta ili smještaja proizvoda dužan je da vlasniku odnosno korisniku zemljišta plati naknadu za to korištenje. Naknada za korištenje utvrđuje se sporazumno, u suprotnom putem nadležnog suda.

(3) Ako je zbog izgradnje šumske transportne infrastrukture neophodno koristiti parcele trećih lica izvršit će se eksproprijacija takvih parcela u skladu sa Zakonom o eksproprijaciji („Službene novine Federacije BiH“, br. 70/07 i 36/10). Od drugih vlasnika šume i ostalih pravnih ili fizičkih lica koja imaju koristi od ovakve infrastrukture, može se zahtijevati da učestvuju u troškovima izgradnje i održavanja u skladu sa koristima koje će imati od toga.

VI. PROMJENA NAMJENE I KORIŠTENJE ŠUMA U DRUGE SVRHE

A. Promjena namjene šumskog zemljišta i gradnja u šumi

Član 60.
(Izdvajanje iz šumsko privrednog područja)

(1) Vlada Federacije BiH može na prijedlog Federalnog ministarstva pojedine dijelove državnih šuma izdvojiti iz šumsko privrednog područja radi njihovog korištenja za potrebe Oružanih snaga Bosne i Hercegovine i policijskih struktura.

(2) Šume iz stava 1. ovog člana, u skladu sa odredbama člana 30. stav 1. tačka b. Vlada Federacije BiH proglašava šumama posebne namjene.

Član 61. (Krčenje šume)

(1) Krčenje šuma odnosno promjena namjene šumskog zemljišta je zabranjeno.

(2) Krčenje šume, odnosno promjena namjene šumskog zemljišta, može se dozvoliti samo ako se radi o izgradnji objekata planiranih važećim planom prostornog uređenja.

(3) Federalno ministarstvo, na osnovu prethodne saglasnosti kantonalnog ministarstva, donosi rješenje kojim se dozvoljava promjena namjene šumskog zemljišta u skladu sa stavom 2. ovog člana.

(4) Zahtjev za krčenje šuma odnosno prevođenje šumskog zemljišta drugoj namjeni može podnijeti vlasnik ili koncesionar.

(5) Zahtjev za krčenje, odnosno promjenu namjene šumskog zemljišta, podnosi se kantonalnom ministarstvu i sadrži sljedeću dokumentaciju:

- a) izvadak iz važećeg plana prostornog uređenja;
- b) izvadak iz zemljišnih knjiga i kopiju katastarskog plana;
- c) koncesioni ugovor ako se radi o koncesiji;
- d) okolišnu saglasnost u skladu sa propisima o zaštiti okoliša;
- e) saglasnost organa nadležnog za zaštitu istorijskog i prirodnog naslijeđa;
- f) mišljenje kantonalne uprave;
- g) odgovarajući vodni akt za gradnju planiranog objekta izdat od nadležnog organa.

(6) Kantonalno ministarstvo svojim rješenjem odbija zahtjev za promjenu namjene zemljišta u slučaju da isti nije podnijela ovlaštena osoba iz stava 4. ovog člana ili ukoliko ne sadrži dokumentaciju propisanu stavom 5. ovog člana kojom se dokazuje njegova osnovanost. Protiv rješenja kantonalnog ministarstva može se izjaviti žalba Federalnom ministarstvu u roku od 15 dana od dana prijema rješenja.

(7) Odredbe ovog zakona i podzakonskih propisa donesenih na osnovu njega, a koji se tiču zaštite šuma, primjenjuju se i za šume za koje je izdata dozvola za krčenje ako nisu iskrčene.

(8) Ako se u roku od dvije godine od dana dostavljanja dozvole iz stava 2. ovog člana iskrčeno zemljište ne privede namjeni radi koje je krčenje izvršeno, korisnik iskrčenog zemljišta dužan je o svom trošku izvršiti njegovo pošumljavanje.

(9) Dozvola za krčenje šume odnosno promjenu namjene šumskog zemljišta važi dvije godine od dana njenog donošenja.

(10) Podnosilac zahtjeva za promjenu namjene šumskog zemljišta odnosno krčenje šume obavezan je uplatiti naknadu čija vrijednost se određuje u visini troškova podizanja i održavanja novih šuma na površini koja ne može biti manja od površine kojoj se mijenja namjena dodajući tome tržišnu vrijednost drveta koja se dobije sječom, o čemu se donosi poseban zaključak. Naknada se uplaćuje kao namjenski prihod Budžeta Federacije BiH u iznosu od 40% i namjenski prihod budžeta kantona u iznosu od 60% i ista se može koristiti na području jedinice lokalne samouprave na čijoj teritoriji je ostvarena samo u svrhu podizanja novih šuma i kupovinu šuma u skladu sa odredbama ovog zakona.

(11) Visinu naknade iz stava 10. ovog člana procjenjuje stručna komisija kantonalne uprave.

(12) Troškove postupka za izdavanje dozvole iz ovog člana snosi podnosilac zahtjeva.

(13) Federalno ministarstvo donosi rješenje iz stava 3. ovog člana nakon dostavljanja dokaza o izvršenoj uplati naknade iz stava 10. ovog člana.

(14) Protiv rješenja iz stava 3. ovog člana nije dozvoljena žalba ali se može pokrenuti upravni spor pred nadležnim sudom.

Član 62. **(Gradnja u šumi)**

(1) U šumi i na šumskom zemljištu može se graditi samo šumska infrastruktura, objekti potrebni za gospodarenje šumama u skladu sa važećom šumsko privrednom osnovom i lovno uzgojni i lovno tehnički objekti u skladu sa važećom lovno privrednom osnovom.

(2) Izuzetno od stava 1. ovog člana, gradnja objekata predviđenih važećim planom prostornog uređenja može se dozvoliti tek nakon pribavljanja dozvole za promjenu namjene zemljišta iz člana 61. ovog zakona.

(3) U izradi plana prostornog uređenja iz čl. 20. stav 1. i 21. Zakona o prostornom planiranju i korištenju zemljišta na nivou Federacije Bosne i Hercegovine („Službene novine Federacije BiH“, br. 2/06, 72/07 i 32/08), obavezno učestvuju predstavnici kantonalne uprave.

(4) Prije donošenja plan prostornog uređenja iz stava 3. ovog člana prethodno je potrebno pribaviti mišljenje kantonalne uprave.

(5) Prije izdavanja dozvole za gradnju objekata predviđenih planom prostornog uređenja neophodno je pribaviti dozvolu za promjenu namjene šumskog zemljišta iz člana 61. ovog zakona, osim za objekte iz stava 1. ovog člana.

(6) Imovinsko-pravni odnosi za objekte iz stava 2. ovoga člana rješavaju se u skladu sa odredbama Zakona o eksproprijaciji. Naplaćena sredstva su prihod Budžeta Federacije BiH. Jedinica lokalne samouprave oslobođena je plaćanja naknade u postupku eksproprijacije za objekte komunalne i prometne infrastrukture čiji je ona investitor.

B. Zakup

Član 63. **(Zakup šumskog zemljišta)**

(1) Davanje državnih šuma i šumskog zemljišta u zakup je zabranjeno.

(2) Izuzev od odredbi stava 1. ovog člana, Federalno ministarstvo može pojedina šumska zemljišta ugovorom davati u zakup radi postavljanja objekata čija je gradnja predviđena ugovorom o koncesiji, telekomunikacijskih objekata, uzgoja divljači i podizanja višegodišnjih nasada ukoliko se time ne narušavaju funkcije šume, uz prethodno pribavljeno mišljenje kantonalne uprave.

(3) Šumsko zemljište koje se daje u zakup može se koristiti samo u skladu sa ugovorom o zakupu i ne može se davati u podzakup.

(4) Prije sklapanja ugovora o zakupu šumskog zemljišta potrebno je pribaviti mišljenje Federalnog pravobranilaštva / Federalnog pravobraniteljstva.

(5) Naknada koja se ostvaruje po osnovu ugovora o zakupu iz stava 2. ovog člana uplaćuje se na račun Budžeta Federacije.

(6) Uslove, namjenu, cijenu i način davanja šumskog zemljišta u državnom vlasništvu u zakup i zasnivanje prava služnosti propisuje Vlada Federacije BiH.

C. Služnost

Član 64. (Pravo služnosti na državnoj šumi i šumskom zemljištu)

(1) Na šumi i šumskom zemljištu u državnom vlasništvu može se uspostaviti pravo služnosti u svrhu izgradnje vodovoda, kanalizacije, plinovoda, električnih vodova i vodova koji omogućavaju prenos signala, kao i služnost puta.

(2) Ugovor kojim se uspostavlja služnost na šumi i šumskom zemljištu u državnom vlasništvu zaključuje se između korisnika i Federalnog ministarstva.

(3) Naknada koja se ostvaruje po osnovu zasnivanja prava služnosti iz stava 1. ovog člana uplaćuje se u korist Budžeta Federacije BiH.

(4) Jedinica lokalne samouprave je oslobođena plaćanja naknade iz stava 3. ovog člana za objekte komunalne i prometne infrastrukture čiji je ona investitor.

VII. ŠUMARSKE INSTITUCIJE

A. Federalna uprava za šumarstvo

Član 65. (Poslovi Federalne uprave)

Federalna uprava obavlja slijedeće poslove:

- a) pribavlja podatke i vodi bazu podataka o stanju i razvoju svih šuma, uključujući inventuru svih šuma, utvrđuje i vodi katastar šuma i šumskog zemljišta i katastar šumske infrastrukture u državnom i privatnom vlasništvu za Federaciju;
- b) izrađuje Šumarski program Federacije, te planira, prati i analizira njegovu realizaciju;
- c) priprema i prati sprovođenje kontinuirane inventure šuma na velikim površinama;
- d) izrađuje šumskoprivredne osnove za državne i privatne šume i vodi evidenciju njihovog važenja;
- e) izrađuje programe poticaja za šumarstvo i lovstvo koji se finansiraju iz Budžeta Federacije BiH;
- f) prati zdravstveno stanje šuma i prati stanje i stepen oštećenosti šuma;
- g) koordinira izradu programa zaštite šuma i godišnjih planova protupožarne zaštite i vodi baze podataka;
- h) izrađuje podloge za programe razvoja šumarstva i osigurava podatke za potrebe prostornih planova uz primjenu tehničkih normativa iz oblasti šumarstva;
- i) prati ekonomsko stanje šumarstva na osnovu podataka dobivenih od strane kantonalnih uprava i o tome redovno podnosi izvještaj federalnom ministarstvu sa izvještajem o transparentnom načinu prodaje šumskih drvnih sortimenata i njihovim cijenama;
- j) izrađuje godišnji izvještaj o stanju šuma i stanju u oblasti šumarstva i dostavlja ga Vladi Federacije BiH putem Federalnog ministarstva;
- k) upoznaje javnost o stanju šuma i razvoju šumarstva i izdaje prigodne stručno-popularne publikacije o stanju šuma i njihovom značaju;

- l) koordinira i sudjeluje u izradi plana i programa na uspostavljanju, razvoju i povezivanju informacionog sistema šumarstva na nivou Federacije i BiH i administrira centralnu bazu podataka;
- m) podržava i promoviše naučno istraživačku djelatnost i prijenos znanja iz oblasti šumarstva;
- n) organizuje savjetovanja i pruža stručnu pomoć kantonalnim upravama i korisnicima šuma;
- o) prati i primjenjuje međunarodne konvencije i standarde iz oblasti šumarstva;
- p) izrađuje i sprovodi strategiju borbe protiv korupcije u suradnji sa kantonalnim upravama;
- q) prati izvršenje svih ugovora koje zaključuje Federalno ministarstvo za oblast šumarstva;
- r) obavlja druge poslove u skladu sa odredbama ovoga zakona i Zakona o sjemenu i sadnom materijalu.

B . Kantonalna uprava za šumarstvo

Član 66. (Poslovi kantonalne uprave)

- (1) Kantonalna uprava obavlja slijedeće poslove:
- a) osigurava neposrednu zaštitu državnih šuma putem čuvarske službe;
 - b) prikuplja podatke i vodi bazu podataka o stanju i razvoju svih šuma i vodi katastar šuma i šumskog zemljišta na području kantona i dostavlja ih Federalnoj upravi;
 - c) priprema kantonalni šumskorazvojni plan i podnosi ga kantonalnom ministarstvu;
 - d) prati realizaciju šumskoprivrednih osnova putem godišnjih planova realizacije;
 - e) obavlja poslove dijagnostno prognozne službe i prati stanje i stepen oštećenosti šuma i o tome obavještava Federalnu upravu;
 - f) prati izvršenje ugovornih obaveza koji se odnose na državne šume;
 - g) prati realizaciju programa zaštite šuma;
 - h) vrši obilježavanje i održavanje granica državnih šuma;
 - i) obavještava i dostavlja podatke o šumskim požarima Federalnoj upravi;
 - j) usaglašava šumskoprivredne osnove sa prostornim planovima, vodoprivrednim osnovama, lovnoprivrednim osnovama, evidencijama koje se vode u Zavodu za zaštitu kulturno historijskog i prirodnog naslijeđa i federalnim programom upravljanja mineralnim sirovinama i planovima upravljanja s pojedinim mineralnim sirovinama;
 - k) prati i analizira ekonomsko stanje u oblasti šumarstva na području kantona i podatke sa izvještajem o transparentnom načinu prodaje šumskih drvnih sortimenata i njihovim cijenama dostavlja Federalnoj upravi;

- l) priprema i izrađuje programe iz oblasti šumarstva koji se finansiraju ili sufinansiraju iz namjenskih sredstava budžeta kantona;
- m) priprema i daje mišljenje za proglašenje zaštitnih i šuma sa posebnom namjenom na način propisan ovim zakonom;
- n) izrađuje i donosi osnovni cjenovnik šumskih proizvoda koji služi kao osnovica za obračun naknade za obavljanje stručnih poslova u privatnim šumama, naknade za korištenje državnih šuma i služi kao početni cjenovnik za transparentan način prodaje šumskih drvnih proizvoda;
- o) organizuje savjetovanja i pruža stručnu pomoć korisniku i vlasnicima privatnih šuma;
- p) izrađuje planove za izgradnju i održavanje šumskih cesta i zaštitu izvorišta i vodotoka unutar šumskih resursa koji se finansiraju iz budžeta kantona, uz saglasnost nadležnog organa za poslove vodoprivrede;
- q) upoznaje javnost sa stanjem šuma i izdaje odgovarajuće stručno-popularne publikacije o stanju šuma i njihovom značaju;
- r) obavlja i druge poslove i zadatke koji proizlaze iz ovoga zakona i Zakona o sjemenu i sadnom materijalu.

(2) Kantonalna uprava dužna je na zahtjev Federalne uprave dostaviti sve tražene podatke koji se odnose na šume i šumsko zemljište na području kantona.

Član 67. **(Čuvanje šuma)**

(1) Kantonalna uprava je dužna obezbjediti neposrednu zaštitu državnih šuma i šumskog zemljišta – čuvanje šuma od šumskih požara i drugih elementarnih nepogoda, biljnih bolesti i štetočina, bespravnog prisvajanja i korištenja, kao i drugih protivzakonitih radnji, putem organizovane čuvarske službe.

(2) Čuvarska služba iz stava 1. ovog člana formira se unutar kantonalne uprave sa određenim čuvarskim reonima. Čuvarsku službu obavljaju čuvari šuma koje za to ovlasti kantonalna uprava.

(3) Čuvari šume mogu biti lica koja su završila srednju šumarsku školu III ili IV stepen, koja ispunjavaju uslove za nošenje oružja i druge uslove za obavljanje javne službe.

(4) Čuvari šuma su ovlaštene službene osobe.

(5) Čuvari šuma službu obavljaju u uniformi, moraju biti naoružani i moraju posjedovati dokument – legitimaciju čuvara šuma kojim potvrđuju status čuvara šuma. Legitimaciju imaju i druga stručna lica koja imaju ovlaštenje za poslove zaštite šuma.

(6) Dužnosti čuvara šuma su da:

- a) čuva šumu od šumskih požara na način kako je utvrđeno ovim zakonom i planovima zaštite šuma od požara;
- b) čuva državnu šumu i šumska zemljišta od bespravnog zauzimanja i korištenja, od bespravnih sječa, sprječava bespravnu izgradnju u šumi i na šumskim zemljištima;
- c) evidentira bespravno posječena stabla u propisane obrasce i obilježava ih;
- d) prati pojave i kretanje biljnih bolesti i štetočina i štete nanosene šumi od divljači;

- e) prati stanje divljači;
- f) prati održavanje šumskog reda;
- g) sprječava nezakonito pokretanje drveta iz šume, ubiranje i sakupljanje nedrvnih proizvoda i stavljanje istih u promet;
- h) zaustavlja prijevozna sredstva i pregleda prateću dokumentaciju za prijevoz šumskih sortimenata;
- i) pregleda porijeklo drveta u pogonima za preradu drveta i na svim drugim mjestima gdje se drvo skladišti;
- j) pregleda sav transport na šumskim putevima;
- k) sprječava istresanje, deponovanje i odlaganje smeća i drugog otpada u šumu i uništavanje graničnih znakova;
- l) sačinjava zapisnik o protivpravnoj radnji sa neophodnim podacima o izvršenoj radnji, izvršiocima i visini štete;
- m) legitimira sva lica zatečena u vršenju prekršajnih radnji po ovom zakonu i krivičnih djela koja se odnose na šume ili za koja postoji osnovana sumnja da su izvršila takva djela, ako se ne može utvrditi identitet tih lica na drugi način;
- n) preduzima mjere da bi se sačuvali tragovi krivičnog djela, predmeti na kojima je ili pomoću kojih je učinjeno krivično djelo i drugi dokazi o njima i
- o) obavještava neposrednog rukovodioca, policijsku upravu i nadležnu šumarsku inspekciju o svim zapaženim nepravilnostima.

(7) Za sve bespravne aktivnosti u skladu sa svojim dužnostima iz stava 6. ovog člana, čuvar šuma obavezan je bez odlaganja sačiniti zapisnik o protivpravnoj radnji sa neophodnim podacima radi podnošenja prekršajnog naloga, odnosno zahtjeva, putem kantonalne uprave nadležnom sudu za pokretanje prekršajnog postupka ili pisane prijave nadležnom tužilaštvu za bespravnu aktivnost koja ima obilježje krivičnog djela.

(8) Svako lice je dužno da na zahtjev čuvara šuma pokaže lične isprave kojim se utvrđuju njegov identitet i isprave za drvo i ostale šumske proizvode u prevozu ili uskladištene, kao i da na zahtjev čuvara šuma drvo ili nedrvne proizvode stavljenе u promet u suprotnosti sa članom 27. ovog zakona ostavi na licu mjesta ili preveze na određenu lokaciju radi skladištenja istih.

(9) Federalni ministar donosi pravilnik o načinu izvršavanja zadataka, obliku i sadržaju legitimacije čuvara šuma, izgledu uniforme i općim kriterijima za utvrđivanje čuvarskih reona.

Član 68.

(Direktor Federalne uprave i direktor kantonalne uprave)

(1) Federalnom upravom rukovodi direktor koji se bira putem javnog konkursa.

(2) Za direktora Federalne uprave u postupku propisanim Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br. 12/03 i 34/03) i pored općih uslova propisanih Zakonom o državnoj službi u Federaciji Bosne i Hercegovine („Službene novine Federacije BiH“, br. 29/03, 23/04, 39/04, 54/04, 67/05 i 8/06), može se imenovati diplomirani inženjer šumarstva sa VII 1. stepenom VSS, odnosno master šumarstva koji je stekao ovo zvanje po Bolonjskom procesu obrazovanja, sa najmanje pet godina radnog iskustva u struci od toga najmanje tri godine na rukovodnim ili složenim poslovima.

(3) Kantonalnom upravom rukovodi direktor koji se bira putem javnog konkursa. Za direktora kantonalne uprave u postupku propisanim Zakonom o ministarskim, vladinim i drugim imenovanjima Federacije Bosne i Hercegovine i pored općih uslova propisanih Zakonom o državnoj službi u Federaciji Bosne i Hercegovine može se imenovati diplomirani inženjer šumarstva sa VII 1. stepenom VSS, odnosno master šumarstva koji je stekao ovo zvanje po Bolonjskom procesu obrazovanja, sa najmanje pet godina radnog iskustva u struci od toga najmanje tri godine na rukovodnim ili složenim poslovima.

VIII. FINANSIRANJE

Član 69. (Namjenska sredstva)

(1) Radi ostvarivanja opšteg interesa i dugoročnih ciljeva zasnovanih na principima održivog gospodarenja šumama utvrđenih Šumarskim programom Federacije, kantonalnim šumsko-razvojnim planovima i šumsko privrednim osnovama obezbjeđuju se finansijska sredstva za zaštitu, unapređenje i podizanje novih šuma i za ruralni razvoj.

(2) Sredstva iz stava 1. ovog člana obezbjeđuju se iz:

- a) naknada za izradu šumskoprivrednih osnova iz člana 11. stav 6. ovog zakona;
- b) naknada za obavljanje stručnih poslova u privatnim šumama iz člana 52. stav 7. ovog zakona;
- c) naknada za korištenje državnih šuma iz člana 55. ovog zakona;
- d) naknada u postupku promjene namjene šuma i šumskog zemljišta iz člana 61. stav 10. ovog zakona;
- e) naknada za općekorisne funkcije šuma iz člana 71. ovog zakona
- f) ostalih izvora u skladu sa ovim zakonom i drugih izvora.

(3) Federalni ministar po prethodno pribavljenom mišljenju federalnog ministra finansija/financija donosi uputstvo o načinu obračunavanja, rokovima i postupku plaćanja naknada za zaštitu, unapređenje i podizanje novih šuma i za ruralni razvoj iz stava 2. ovog člana kao i izgled i sadržaj obrasca za obračun uplate naknade za općekorisne funkcije šuma.

(4) Uplata prihoda iz stava 2. ovog člana vrši se u skladu sa propisima Federalnog ministarstva finansija/financija o načinu uplate javnih prihoda budžeta i vanbudžetskih fondova na teritoriji Federacije.

Član 70. (Uplata naknade za korištenje državnih šuma)

(1) Naknada za korištenje državnih šuma iz člana 55. ovog zakona određuje se i uplaćuje u sljedećim iznosima:

- a) 1% na poseban račun budžeta Federacije;
- b) 1% na poseban račun budžeta Kantona i
- c) 5% na namjenski račun jedinice lokalne samouprave na čijoj teritoriji se ostvaruje prihod.

(2) Naknada iz stava 1. ovog člana za tekuću godinu uplaćuje se za prvo polugodište najkasnije do 30. juna, a za drugo polugodište najkasnije do 30. novembra.

(3) Godinu dana nakon stupanja na snagu ovog zakona, kanton može svojim propisom odrediti druge iznose naknada iz stava 1. tč. b) i c), a najviše u iznosu od 9 %.

Član 71. (Naknada za općekorisne funkcije šuma)

(1) Naknada za općekorisne funkcije šuma plaćaju sva pravna lica koja su registrovana za obavljanje djelatnosti na teritoriji Federacije kao i djelovi pravnih lica čije je sjedište van Federacije, a obavljaju djelatnost na teritoriji Federacije, u visini od 1,00 % od osnovice koju čini neto plaća zaposlenika u radnom odnosu na neodređeno i na određeno vrijeme i naknada isplaćena na osnovu ugovora o djelu. Ovu naknadu plaćaju i sva lica koja obavljaju samostalnu privrednu, profesionalnu i drugu djelatnost.

(2) Naknada iz stava 1. ovog člana obračunava se i uplaćuje istovremeno sa isplatom plaća, odnosno utvrđene naknade po ugovoru.

(3) Naknada iz stava 1. ovog člana uplaćuje se u sljedećim iznosima:

- a) 30,0 % na poseban račun budžeta Federacije;
- b) 60,0 % na poseban račun budžeta Kantona u kojem je ostvaren prihod;
- c) 10,0 % na namjenski račun jedinice lokalne samouprave na čijoj teritoriji je ostvaren prihod.

(4) Od obaveze plaćanja naknade iz stava 1. ovog člana izuzimaju se: korisnici državnih šuma, javne institucije, humanitarne organizacije, udruženja i fondacije izuzev onih koji obavljaju djelatnost radi sticanja dobiti, kao i pravna lica čija je glavna djelatnost poljoprivreda, lov, šumarstvo, ribarstvo, rudarstvo i vađenje rude, prerađivačka industrija i građevinarstvo.

(5) Obaveza uplate naknade iz stava 1. ovog člana zastarjeva u roku od 10 godina od proteka godine u kojoj je obaveza nastala.

(6) Kontrolu obračuna i uplate naknade iz stava 1. ovog člana vrši Porezna uprava Federacije BiH.

(7) Ako obveznik plaćanja naknade ne obračuna ili ne uplati naknadu iz stava 1. ovog člana, inspektor koji je izvršio kontrolu uplate sredstava podnosi kod nadležnog suda prijedlog za prinudno izvršenje ove novčane obaveze, po konačnosti i izvršnosti rješenja o uplati sredstava koje je ispostavio obvezniku.

(8) Godinu dana nakon stupanja na snagu ovog zakona, kanton može svojim propisom odrediti druge iznose naknada iz stava 3. tč. b) i c), a najviše u iznosu od 70 %.

Član 72. (Korištenje namjenskih sredstava Federacije)

(1) Iz namjenskih sredstava Budžeta Federacije BiH prikupljenih po osnovu člana 69. stav 2. ovog zakona finansira i/ili sufinansira se:

- a) izrada i revizija Šumarskog programa Federacije;
- b) kontinuirane inventure šuma na velikim površinama;
- c) rad čuvarske službe;

- d) izrada šumsko-privrednih osnova za državne;
- e) kontrola nad izradom šumsko-privrednih osnova za državne i privatne šume;
- f) biološka reprodukcija državnih i privatnih šuma u obimu većem od onog koji je predviđen šumsko privrednom osnovom;
- g) obnova državnih i privatnih šuma od posljedica elementarnih nepogoda, prenamnoženja insekata, požara i slično;
- h) unapređenje proizvodnje šumskog reproduccionog materijala;
- i) očuvanje i unapređenje genofonda rijetkih i ugroženih vrsta šumskog drveća;
- j) očuvanja i unapređenja bioraznolikosti šumske flore i faune;
- k) pošumljavanje krša i produktivnih neobraslih šumskih zemljišta;
- l) provođenje procesa deminiranja šuma i šumskog zemljišta;
- m) izgradnja, održavanje i unaprjeđenje šumske putne infrastrukture u obimu većem od onog koji je predviđen šumsko privrednom osnovom;
- n) sufinansiranje tehničkih specijalističkih kurseva;
- o) naučna istraživanja i stručne analize;
- p) razvoj i unaprjeđenje jedinstvenog informacionog sistema u šumarstvu;
- q) kupovina šuma i šumskog zemljišta;
- r) druge namjene za unapređenje šuma i
- s) za druge poslove Federalne uprave propisane ovim zakonom.

(2) Federalni ministar donosi pravilnik kojim se utvrđuje postupak i kriteriji za dodjelu namjenskih sredstava u oblasti šumarstva iz Budžeta Federacije BiH.

Član 73.

(Korištenje namjenskih sredstava kantona)

(1) Iz namjenskih sredstava budžeta kantona prikupljenih na osnovu člana 70. stav 2. ovoga zakona, finansiraju se slijedeći poslovi:

- a) rad čuvarske službe;
- b) izrada i revizija kantonalnog šumskorazvojnog plana;
- c) izrada šumskoprivrednih osnova za privatne šume;
- d) biološka obnova šuma u obimu većem od onog koji je predviđen šumskoprivrednom osnovom;
- e) obnova šuma od posljedica elementarnih nepogoda, prenamnoženja insekta, požara i slično;
- f) unaprjeđenje proizvodnje šumskog reproduktivnog materijala;
- g) organizovanje tehničkih specijalističkih kurseva;
- h) očuvanje i unaprjeđenje bioraznolikosti šumskih ekosistema;
- i) druge namjene za unaprjeđenje šuma.

(2) Kantonalna uprava priprema program podrški za šumarstvo na osnovu kriterija za dodjelu namjenskih sredstava kantona i dostavlja ga kantonalnom ministru na odobravanje i donošenje. Prilikom pripreme programa kantonalna uprava će poštivati kantonalni šumskorazvojni plan i iznos sredstava utvrđenih budžetom kantona u tekućoj godini za te namjene.

(3) Kantonalni ministar donosi pravilnik kojim se propisuje postupak i kriteriji za dodjelu namjenskih sredstava u oblasti šumarstva iz budžeta kantona.

Član 74.
(Korištenje namjenskih sredstava jedinica lokalne samouprave)

(1) Sredstva iz člana 70. stav 1. tačka c) i člana 71. tačka c) ovog zakona koriste se za izgradnju, rekonstrukciju i održavanje infrastrukture na području jedinice lokalne samouprave, pošumljavanje krša, zaštitu šuma od požara i ruralni razvoj.

(2) Ukoliko jedinica lokalne samouprave ocijeni potrebnim, u skladu sa mogućnostima mogu se finansirati/sufinansirati i svi poslovi predviđeni čl. 72.i 73. ovog zakona a u svrhu očuvanja i unaprjeđenja šumskih ekosistema.

(3) Predstavničko tijelo jedinice lokalne samouprave donosi godišnji plan o utrošku namjenskih sredstava. Prije donošenja ovog plana sredstva se ne mogu trošiti.

IX. NADZOR NAD SPROVOĐENJEM OVOG ZAKONA

Član 75.
(Upravni nadzor)

(1) Federalno ministarstvo vrši nadzor nad primjenom ovog zakona i propisa donesenih na osnovu ovog zakona koji su ovim zakonom stavljeni u nadležnost Federacije, kao i upravni nadzor nad obavljanjem poslova određenih ovim zakonom koji predstavljaju vršenje javnih ovlaštenja.

(2) U vršenju nadzora nad izvršavanjem poslova u vršenju javnih ovlaštenja, iz stava 1. ovog člana, Federalno ministarstvo ostvaruje neposredan uvid i kontrolu u postupanju, vrši pregled akata i dokumentacije koju donose institucije i upravne organizacije u vršenju javnih ovlaštenja, daje instrukcije i smjernice za izvršavanje poslova i traži podatke i obavještenja o izvršavanju poslova u vršenju javnih ovlaštenja.

(3) Federalno ministarstvo po službenoj dužnosti vrši i upravni nadzor nad kantonalnim ministarstvima u dijelu izvršenja federalne politike u oblasti očuvanja i zaštite šuma, planiranja i upravljanja šumama i finansiranja obnove i unaprjeđenja šuma na teritoriji Federacije.

(4) Federalno ministarstvo vrši i upravni nadzor u žalbenom postupku putem svojih ovlaštenja kao drugostepenog organa.

(5) Kantonalna ministarstva vrše upravni nadzor nad provođenjem ovog zakona i propisa donesenih na osnovu ovog zakona koji su ovim zakonom stavljeni u nadležnost kantona kao i upravni nadzor nad obavljanjem poslova određenih ovim zakonom koji predstavljaju vršenje javnih ovlaštenja, a stavljeni su u nadležnost kantona.

Član 76.
(Inspekcijski nadzor)

(1) Inspekcijski nadzor u provođenju ovog zakona i propisa donesenih na osnovu ovog zakona vrše federalna šumarska inspekcija i kantonalna šumarska inspekcija.

(2) Inspekcijski nadzor se vrši u skladu sa Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj

35/05) i Zakonom o inspekcijama u Federaciji BiH („Službene novine Federacije BiH“, broj 69/05) - (u daljem tekstu: Zakon o inspekcijama).

(3) Inspeksijski nadzor nad primjenom ovog zakona neposredno obavljaju federalni i kantonalni šumarski inspektori kao državni službenici sa posebnim ovlaštenjima i odgovornostima (u daljem tekstu: šumarska inspekcija).

Član 77.

(Federalna šumarska inspekcija i kantonalna šumarska inspekcija)

(1) Federalna šumarska inspekcija može neposredno obaviti poslove iz nadležnosti kantonalne šumarske inspekcije, kada ocijeni da se na drugi način ne mogu provesti odredbe ovog zakona ili drugi propisi doneseni na osnovu njega, a nadležna kantonalna šumarska inspekcija nije obavila inspeksijski nadzor u za to naloženom roku ili nije završila postupak u roku.

(2) Kantonalna šumarska inspekcija može po ovlaštenju i nalogu federalne šumarske inspekcije, izvršiti inspeksijski nadzor iz nadležnosti federalne šumarske inspekcije.

Član 78.

(Uslovi za imenovanje šumarskog inspektora)

Za federalnog šumarskog inspektora i kantonalnog šumarskog inspektora može se imenovati lice koje:

- a) ima visoku stručnu spremu šumarske struke, diplomirani inženjer šumarstva sa VII 1. stepenom VSS, odnosno master šumarstva koji je stekao ovo zvanje po Bolonjskom procesu obrazovanja;
- b) ima položen stručni upravni ispit za rad u organima uprave, odnosno položen ispit općeg znanja predviđen za državne službenike organa uprave u Federaciji ili javni ispit predviđen za državne službenike institucija Bosne i Hercegovine;
- c) ima položen stručni šumarski ispit;
- d) ima najmanje pet godina radnog staža u struci.

Član 79.

(Ovlaštenja federalnog šumarskog inspektora)

(1) Pored ovlaštenja i dužnosti određenih Zakonom o inspekcijama, šumarski inspektor je ovlašten i dužan da:

- a) pregleda šumsko privredne osnove, godišnje planove gospodarenja, šumsko razvojne planove i programe, izvedbene projekte, planove biološke obnove šuma i planove zaštite šuma, kontroliše njihovo izvršenje, poslovne knjige i ostalu dokumentaciju;
- b) vrši kontrolu uplate naknade za izradu šumsko privredne osnove iz člana 11. stav 6.;
- c) pregleda sve radove koji se obavljaju u šumi, objekte, uređaje, pogone za preradu drveta, kao i sva mjesta gdje se drvo sječe, smješta, prerađuje, izvozi iz šume ili stavlja u promet;
- d) pregleda izvršenje svih radova koji su predviđeni šumsko privrednom osnovom i godišnjim planom realizacije osnove;

- e) pregleda i provodi mjere na zaštiti šuma i šumskih zemljišta od protivpravnog prisvajanja i korištenja i bespravne izgradnje objekata;
- f) vrši nadzor nad provođenjem i drugih mjera za zaštitu šuma i propisnog uspostavljanja i održavanja šumskog reda;
- g) vrši nadzor nad provođenjem propisa o proizvodnji i prometu šumskog sjemena i šumskog sadnog materijala;
- h) vrši nadzor nad provođenjem postupaka transparentne prodaje šumskih drvnih sortimenata porijeklom iz državnih šuma;
- i) pokreće i vodi inspekcijski nadzor po službenoj dužnosti kao i po zahtjevu svih pravnih i fizičkih lica i o utvrđenom stanju i preduzetim mjerama pismeno obavještava podnosioca zahtjeva;
- j) upoznaje javnost sa utvrđenim stanjem šuma i o preduzetim mjerama na otklanjanju nedostataka;
- k) sarađuje sa Federalnom upravom, kantonalnom upravom, inspekcijskim organima iz drugih oblasti, pravosudnim organima i organima policije.

(2) U obavljanju inspekcijskih poslova šumarski inspektor, pored nadležnosti utvrđenih propisom o inspekcijama u Federaciji Bosne i Hercegovine, ima pravo i obavezu da:

- a) privremeno obustavi sječu i sve druge radnje koje nisu u skladu sa odredbama ovog zakona, drugih propisa iz oblasti šumarstva i odobrenim planskim dokumentima za gospodarenje šumama, do konačne odluke nadležnog organa;
- b) kontroliše i zaustavlja prijevozna sredstva i pregleda prateću dokumentaciju za prevoz šumskih drvnih sortimenata i nedravnih šumskih proizvoda na šumskim, lokalnim, regionalnim i magistralnim putevima;
- c) privremeno oduzima bespravno posječeno drvo i drvo nezakonito stavljeno u promet i nedrvne šumske proizvode;
- d) naredi obustavu bespravne izgradnje na šumskom zemljištu i dovođenje zemljišta u prvobitno stanje;
- e) naredi napuštanje bespravno zauzetog državnog šumskog zemljišta;
- f) naredi provođenje mjera zaštite od požara;
- g) naredi provođenje mjera zaštite na radu;
- h) naredi obilježavanje zaštitnih šuma i šuma sa posebnom namjenom vidljivim znakovima;
- i) zabrani upotrebu nedozvoljenih hemijskih sredstava

(3) U obavljanju inspekcijskih poslova iz stava 1. ovog člana šumarski inspektor, pored nadležnosti utvrđenih propisom o inspekcijama u Federaciji Bosne i Hercegovine, ima pravo i obavezu privremeno zabraniti rad pravnom licu do konačne odluke nadležnog organa ako:

- a) obavlja radove u šumi u suprotnosti sa odredbama šumsko privredne osnove, godišnjeg plana gospodarenja, godišnjeg plana realizacije šumsko privredne osnove, šumsko razvojnog plana i programa, izvedbenog projekta, planova biološke obnove šuma i planova zaštite šuma;
- b) obavlja i druge radove u šumi u suprotnosti sa odredbama ovog zakona.

(4) U hitnim slučajevima u kojima bi mogla nastupiti šteta po opšti interes, šumarski inspektor je ovlašten da na licu mjesta rješenjem naredi obustavu rada i provođenje mjera za sprječavanje šteta.

(5) Šumarski inspektor dužan je uvijek kada utvrdi da je učinjeno djelo koje ima obilježje prekršaja propisanog ovim zakonom podnijeti prekršajni nalog ili zahtjev nadležnom sudu za pokretanje prekršajnog postupka.

(6) Šumarski inspektor dužan je uvijek kada utvrdi da je učinjeno djelo koje ima obilježje krivičnog djela čija su obilježja propisana Krivičnim zakonom („Službene novine Federacije BiH“, br. 36/03, 37/03, 21/04, 69/04, 18/05 i 42/10) podnijeti pisanu prijavu nadležnom tužilaštvu.

(7) Šumarski inspektor preduzima i druge mjere i radnje za koje je ovlašten ovim zakonom i drugim propisima.

Član 80.

(Ovlaštenja kantonalnog šumarskog inspektora)

(1) Pored ovlaštenja i dužnosti određenih Zakonom o inspekcijama, šumarski inspektor je ovlašten i dužan da:

- a) pregleda šumsko privredne osnove, godišnje planove realizacije osnove, šumsko razvojne planove i programe, pregleda izvedbene projekte, planove biološke obnove šuma i planove zaštite šuma, kontroliše njihovo izvršenje, poslovne knjige i ostalu dokumentaciju;
- b) vrši kontrolu uplate naknade za izradu šumsko privredne osnove iz člana 11. stav 6.;
- c) pregleda odabiranje i doznaku stabala za sječu;
- d) pregleda sve radove koji se obavljaju u šumi, objekte, uređaje, pogone za preradu drveta, kao i sva mjesta gdje se drvo sječe, smješta, prerađuje, izvozi iz šume ili stavlja u promet na području kantona;
- e) pregleda izvršenje svih radova koji su predviđeni projektima za izvođenje;
- f) pregleda kako se provodi utvrđivanje zdravstvenog stanja šuma i mjera za suzbijanje biljnih bolesti i štetočina;
- g) pregleda planove zaštite šuma od požara i provođenje planiranih mjera; i naredi otklanjanje nedostataka;
- h) pregleda provođenje mjera na zaštiti šuma i šumskih zemljišta od protivpravnog prisvajanja i korištenja i bespravne izgradnje objekata;
- i) vrši nadzor nad provođenjem i drugih mjera za zaštitu šuma i propisnog uspostavljanja i održavanja šumskog reda i vršenja neposrednog čuvanja šuma;
- j) saraduje sa Federalnom upravom, kantonalnom upravom, inspekcijским organima iz drugih oblasti, pravosudnim organima i organima policije.

(2) U obavljanju inspekcijских poslova šumarski inspektor, pored nadležnosti utvrđenih propisom o inspekcijama u Federaciji Bosne i Hercegovine, ima pravo i obavezu da:

- a) privremeno obustavi sječu i sve druge radnje koje nisu u skladu sa odredbama ovog zakona, drugih propisa iz oblasti šumarstva i odobrenim planskim dokumentima za gospodarenje šumama, do konačne odluke nadležnog organa;
- b) kontroliše i zaustavlja prijevozna sredstva i pregleda prateću dokumentaciju za prevoz šumskih drvnih sortimenata i nedrvnih

šumskih proizvoda na šumskim, lokalnim, regionalnim i magistralnim putevima;

- c) privremeno oduzima bespravno posječeno drvo i drvo nezakonito stavljeno u promet i nedrvne šumske proizvode;
- d) naredi obustavu bespravne izgradnje na šumskom zemljištu i dovođenje zemljišta u prvobitno stanje;
- e) naredi napuštanje bespravno zauzetog državnog šumskog zemljišta;
- f) naredi provođenje mjera zaštite od požara;
- g) naredi provođenje mjera zaštite na radu;
- h) naredi obilježavanje zaštitnih šuma i šuma sa posebnom namjenom vidljivim znakovima;
- i) zabrani upotrebu nedozvoljenih hemijskih sredstava.

(3) U obavljanju inspekcijskih poslova iz stava 1. ovog člana šumarski inspektor, pored nadležnosti utvrđenih propisom o inspekcijama u Federaciji Bosne i Hercegovine, ima pravo i obavezu privremeno zabraniti rad pravnom licu do konačne odluke nadležnog organa ako:

- a) obavlja radove u šumi u suprotnosti sa odredbama šumsko privredne osnove, godišnjeg plana gospodarenja, godišnjeg plana realizacije šumsko privredne osnove, šumsko razvojnog plana i programa, izvedbenog projekta, planova biološke obnove šuma i planova zaštite šuma;
- b) obavlja i druge radove u šumi u suprotnosti sa odredbama ovog zakona.

(4) U hitnim slučajevima u kojima bi mogla nastupiti šteta po opšti interes, šumarski inspektor je ovlašten da na licu mjesta rješenjem naredi obustavu rada i provođenje mjera za sprječavanje šteta.

(5) Šumarski inspektor dužan je uvijek kada utvrdi da je učinjeno djelo koje ima obilježje prekršaja propisanog ovim zakonom podnijeti prekršajni nalog ili zahtjev nadležnom sudu za pokretanje prekršajnog postupka.

(6) Šumarski inspektor dužan je uvijek kada utvrdi da je učinjeno djelo koje ima obilježje krivičnog djela čija su obilježja propisana Krivičnim zakonom („Službene novine Federacije BiH“, br. 36/03, 37/03, 21/04, 69/04, 18/05 i 42/10) podnijeti pisanu prijavu nadležnom tužilaštvu.

(7) Šumarski inspektor preduzima i druge mjere i radnje za koje je ovlašten ovim zakonom i drugim propisima.

(8) Kantonalni šumarski inspektori su, pored navedenog, dužni da na propisan način dostavljaju izvještaje i potrebne podatke federalnom šumarskom inspektoratu.

Član 81.

(Plan i program rada šumarske inspekcije)

(1) Šumarska inspekcija u skladu sa odredbama člana 27. Zakona o inspekcijama donosi godišnji program rada i mjesečni plan rada obavljanja inspekcijskih nadzora.

(2) Pri izradi godišnjeg programa i mjesečnog plana, federalna šumarska inspekcija dužna je tražiti mišljenje Federalnog ministarstva, a kantonalna šumarska inspekcija mišljenje kantonalnog ministarstva.

(3) Glavni federalni šumarski inspektor podnosi mjesečne i godišnji izvještaj o izvršenim inspekcijskim pregledima i preduzetim mjerama u oblasti šumarstva Federalnom ministarstvu

(4) Glavni kantonalni šumarski inspektor podnosi mjesečne i godišnji izvještaj kantonalnom ministarstvu vezano za izvršeni inspekcijski nadzor i preduzetim mjerama iz oblasti šumarstva.

(5) Federalna šumarska inspekcija u saradnji sa kantonalnim šumarskim inspekcijama jednom godišnje na osnovu svojih nalaza i prikupljenih podataka sastavlja cjelovit izvještaj o stanju šuma i stanju u oblasti šumarstva. Ovako pripremljen izvještaj dostavlja se Federalnom ministarstvu i o istom informiše javnost.

Član 82. **(Provođenje inspekcijskog nadzora)**

(1) Šumarski inspektor u obavljanju poslova inspekcijskog nadzora o utvrđenim činjenicama sačinjava zapisnik.

(2) Ako šumarski inspektor prilikom vršenja inspekcijskog nadzora ustanovi da ovaj zakon i podzakonski propis donesen na osnovu njega nisu primjenjeni ili da su nepravilno primjenjeni postupiće u skladu sa odredbama Zakona o upravnom postupku („Službene novine Federacije BiH“, br. 2/98 i 48/99), Zakona o inspekcijama ili drugog zakona koji propisuju izricanje odgovarajuće upravne mjere i odrediti rok za njeno izvršenje.

(3) Protiv rješenja federalnog šumarskog inspektora može se izjaviti žalba Federalnom ministarstvu u roku osam dana od prijema rješenja.

(4) Žalba na rješenje federalnog šumarskog inspektora ne odlaže izvršenje rješenja osim u hitnim slučajevima ako bi izvršenjem rješenja bili ugroženi životi i zdravlje ljudi odnosno ako bi nastupila znatna materijalna šteta.

(5) Rješenje po žalbi iz stava 3. ovog člana je konačno i protiv njega nije dopuštena žalba, ali se može pokrenuti upravni spor kod kantonalnog suda prema sjedištu prvostepenog organa.

(6) Protiv rješenja kantonalnog šumarskog inspektora može se izjaviti žalba Federalnoj upravi za inspekcijske poslove u roku od osam dana od dana prijema rješenja.

(7) Žalba na rješenje kantonalnog šumarskog inspektora ne odlaže izvršenje rješenja osim u hitnim slučajevima ako bi izvršenjem rješenja bili ugroženi životi i zdravlje ljudi odnosno ako bi nastupila znatna materijalna šteta.

(8) Rješenje po žalbi iz stava 6. ovog člana je konačno i protiv njega nije dopuštena žalba, ali se može pokrenuti upravni spor kod kantonalnog suda prema sjedištu prvostepenog organa.

Član 83. **(Odgoda izvršenja obaveza)**

Glavni federalni šumarski inspektor može uz obrazloženje žalioaca, odložiti izvršenje naloženih mjera, ako žalilac učini vjerovatnim da bi usljed izvršenja tih mjera bili ugroženi životi i zdravlje ljudi, nastupila znatna materijalna šteta na šumi i šumskom zemljištu i drugih dobara koja se na drugi način ne može otkloniti, a odlaganje se ne protivi općem interesu.

Član 84.
(Iskaznica šumarskog inspektora)

(1) Federalni šumarski inspektori i kantonalni šumarski inspektori imaju službenu iskaznicu kojom dokazuju svoje svojstvo, identitet i ovlaštenja predviđena zakonom.

(2) Federalni ministar pravde propisuje oblik i sadržaj iskaznice, a iskaznicu inspektorima izdaje rukovodilac organa uprave u čijoj je nadležnosti pojedina inspekcija.

X. KAZNE NE ODREDBE

Član 85.

(1) Novčanom kaznom od 12.000 do 15.000 KM kaznit će se korisnik šuma ili drugo pravno lice ako:

1. gospodari šumama bez odobrenog godišnjeg plana realizacije šumsko privredne osnove i projekta za izvođenje (član 10. stav 1.);
2. prekorači ukupan obim sječa u visokim šumama sa prirodnom obnovom predviđen na godišnjem nivou a u skladu sa šumsko privrednom osnovom (član 10. stav 4.);
3. izradi projekat za izvođenje suprotno odredbama člana 14. stav 2.;
4. ne izradi i ne donese projekat za izvođenje i ne odredi lice za realizaciju projekta (član 14. st. 5. i 8.);
5. vrši sječu šume suprotno odredbama člana 16. stav 1.;
6. ne obavlja poslove biološke obnove šuma (član 17.);
7. ne izradi planove zaštite šuma od požara (član 35. stav 6.);
8. u šumi vrši upotrebu hemijskih sredstava suprotno odredbama člana 36. st. 1. i 3.;
9. vrši ili dozvoli iskorištavanje nedrvenih šumskih proizvoda suprotno odredbama člana 39. st. 1. i 3.;
10. izgradi šumski put suprotno odredbama člana 42. stav 4.;
11. ako vrši prodaju šumskih drvnih sortimenata suprotno odredbama člana 53. stav 7.;
12. ako prenese na treća lica prava koja proističu po osnovu ugovora (član 53. stav 9.)
13. izvrši krčenje šume odnosno promjenu namjene šumskog zemljišta bez pribavljene dozvole (član 61. st. 1. i 3.);
14. u šumi ili na šumskom zemljištu podigne ili dozvoli podizanje objekata suprotno odredbama člana 62. stav 2.;

(2) Za prekršaj iz stava 1. ovog člana kaznit će se novčanom kaznom u iznosu od 2.500 do 3.000 KM i odgovorno lice u pravnom licu.

Član 86.

(1) Novčanom kaznom od 10.000 do 12.000 KM kaznit će se za prekršaj korisnik šuma ili drugo pravno lice ako:

1. vrši doznaku i sječu stabala u dijelovima šume za koje imovinsko-pravni odnosi nisu rješeni i granice utvrđene i na terenu vidno i na propisan način obilježene (član 15. stav 3.)
2. angažuje zaposlenike suprotno odredbama člana 19. stav 1.;
3. vrši čistu sječu ili pustošenje šuma (član 21. stav 1.);
4. uveze ili koristi šumski reprodukcioni materijal suprotno odredbama člana 23. stav 2.;
5. ne izvrši sanitarne sječe i radnje iz člana 25. st. 1. i 3.;
6. ne vodi propisanu evidenciju i stavlja u promet šumske drvne sortimente u suprotnosti sa pravilnikom iz člana 27. stav 10.;
7. loži ili dozvoli loženje vatre suprotno odredbama člana 35. stav 1.;
8. odlaže otpad, smeće i zagađujuće tvari u šumi (član 36. stav 4.);
9. ne prati zdravstveno stanje šuma (član 38. stav 1.);
10. vrši ili dozvoli uzgoj divljači u šumi suprotno odredbama člana 40. stav 1.;
11. izgradi šumsku infrastrukturu suprotno odredbama člana 42. stav 3.;
12. vrši promet šuma i šumskog zemljišta suprotno odredbama člana 50. stav 1.;
13. ne izvrši obavezu iz člana 71.;
14. ne postupi po rješenju šumarskog inspektora (član 82. stav 2.);
15. ako ne uskladi poslovanje sa odredbama ovog zakona (član. 95.)

(2) Za prekršaj iz stava 1. ovog člana kaznit će novčanom kaznom u iznosu od 2.000 do 3.000 KM odgovorno lice u pravnom licu.

Član 87.

(1) Novčanom kaznom u iznosu od 5.000 do 10.000 KM kaznit će se za prekršaj korisnik šume ili drugo pravno lice ako:

1. vrši radove bez saglasnosti kantonalne uprave (član 13. stav 4.);
2. ne dostavi godišnji plan realizacije (član 13. stav 3.);
3. u roku od dvije godine ne izvrši radove predviđene projektom za izvođenje i ne vodi registar projekata (član 14. st. 3. i 10.);
4. ne izvrši tehnički prijem radova i ostale obaveze u skladu sa odredbama člana 18.;
5. ne obezbijedi mjere zaštite u skladu sa odredbama člana 19. stav 2.;
6. ne izvrši pošumljavanje sječina u roku od dvije godine i ne ucrtta na karti i obilježi na terenu površine za prirodnu obnovu (član 22. st. 1. i 3.);
7. ne izradi plan u skladu sa članom 26. stav 1.;
8. pokreće drvo, dijelove stabala i grane ili stavlja u promet drvo koje nije žigosano i snabdjeveno otpremnim iskazom (član 27. stav 1.);
9. stavlja u promet nedrvne šumske proizvode bez odobrenja (član 27. stav 3.);
10. koje vrši nezakonite radnje navedene u odredbama člana 27. stav 5.;
11. u periodu vegetacije od 01. aprila do 01. novembra, drvo četinara i brijesta uskladištava i stavlja u promet suprotno članu 27. st. 8. i 9;
12. ne gospodari zaštitnim šumama i šumama sa posebnom namjenom shodno aktu o proglašenju i programom gospodarenja i ne obilježi

zaštitne šume i šume sa posebnom namjenom vidljivim znakovima (član 28. st. 4. i 9.);

13. vrši ili dozvoli pašu, žirenje, brst, kresanje lisnika, ne odredi i ne obilježi puteve za progon stoke (član 37. st. 1. i 3.);
14. vrši ili dozvoli sječu ugroženih vrsta suprotno odredbama člana 41. st. 1. i 2.;
15. odobri korištenje šumskih puteva suprotno odredbama člana 43. stav 2.;
16. počini ili dozvoli neovlašteno zauzimanje šuma ili šumskog zemljišta (član 49.)
17. ne vodi evidencije o izvršenim radovima i provedenim mjerama predviđenim kantonalnim šumsko-razvojnim planom, šumsko privrednom osnovom, godišnjim planom gospodarenja i projektima za izvođenje i ne evidentira ih u predviđenom roku (član 54. stav 2.);
18. u roku od dvije godine zemljište ne privede namjeni radi koje je krčenje izvršeno ili ne izvrši njegovo pošumljavanje (član 61. stav 8.).

(2) Za prekršaj iz stava 1. ovog člana kaznit će se novčanom kaznom u visini od 2.000 do 3.000 KM i odgovorno lice u pravnom licu.

Član 88.

Novčanom kaznom u iznosu od 200 – 1.500 KM kaznit će se za prekršaj fizičko lice ako:

1. vrši šumsko - uzgojne radove i sječu šume suprotno odredbama člana 14. stav 7.;
2. vrši sječu bez prethodno izdatog rješenja i doznake (član 15. stav 4.);
3. vrši sječu šume suprotno odredbama člana 16. stav 1.;
4. ne izvrši pošumljavanje sječina u roku od dvije godine i ne obilježi na terenu površine za prirodnu obnovu (član 22. st. 1. i 3.);
5. ne izvrši sanitarnu sječu i ne uspostavi i održava šumski red (član 25. st. 1. i 3. tačka d.);
6. otprema iz šume ili stavlja u promet drvo bez žigosanja i otpremnog iskaza (član 27. stav 1.);
7. stavlja u promet nedrvne šumske proizvode bez odobrenja (član 27. stav 3.);
8. vrši sječu bez doznake i na uzurpiranoj državnoj šumi (član 27. stav 5.);
9. ne gospodari zaštitnim šumama i šumama sa posebnom namjenom shodno aktu o proglašenju i programom gospodarenja (član 28. st. 1., 4);
10. loži vatru suprotno odredbama člana 35. stav 1.;
11. u šumi odlaže smeće i zagađujuće tvari (član 36. st. 1 i 4.);
12. pušta stoku na pašu, žirenje i na pojila bez nadzora čuvara stoke i mimo utvrđenih puteva (član 37. st. 2. i 3.);
13. vrši ili dozvoli sječu ugroženih vrsta suprotno odredbama člana 41. st. 1. i 2.;
14. vrši kretanje motornim vozilima u šumama i na šumskim zemljištima suprotno odredbama člana 43.;

15. u šumama vrši radnje suprotno odredbama člana 44. stav 2.;
16. počini neovlašteno zauzimanje šuma ili šumskoga zemljišta (član 49.);
17. nanosi štetu susjednim parcelama (član 58. stav 1.);
18. izvrši krčenje šume odnosno promjenu namjene šumskog zemljišta bez pribavljene dozvole (član 61. st. 1. i 3.);
19. vrši izgradnju zgrada i drugih objekata suprotno odredbama člana 62. st. 1. i 5.;
20. na zahtjev čuvara šuma ne pokaže lične isprave ili isprave za šumske proizvode (član 67. stav 8.);
21. ne postupi po rješenju šumarskog inspektora (član 82. stav 2.)

XI. PRELAZNE I ZAVRŠNE ODREDBE

Član 89.

Vlada Federacije BiH svojim aktom propisuje način uknjižbe šuma i šumskog zemljišta u državnom vlasništvu.

Član 90.

Obavezuje se Federalna uprava da u roku od dvije godine od dana stupanja na snagu ovog zakona, izradi stručne elaborate za formiranje šumsko privrednih područja u skladu sa odredbama člana 9. stav 5. ovog zakona.

Član 91.

(1) Federalna uprava dužna je u roku od dvije godine od dana stupanja na snagu ovog zakona izraditi nacrt Šumarskog programa Federacije BiH i dostaviti ga Federalnom ministarstvu u skladu sa članom 6. ovog zakona.

(2) Kantonalno ministarstvo dužno je izraditi kantonalni šumsko-razvojni plan u roku od jedne godine od dana donošenja Šumarskog programa Federacije.

(3) Za šumsko privredne osnove izrađene prije stupanja na snagu ovog zakona obim biološke obnove šuma se odnosi na radove u okviru jednostavne biološke reprodukcije šuma.

Član 92.

Kantonalna ministarstva dužna su u roku od tri mjeseca od dana stupanja na snagu ovog zakona dostaviti Federalnom ministarstvu dokumente o proglašenju šuma sa posebnim režimom gospodarenja.

Član 93.

Korisnici šuma dužni su u roku od šest mjeseci od dana stupanja na snagu ovog zakona uskladiti poslovanje sa odredbama ovog zakona.

Član 94.

Ugovori o prijenosu poslova gospodarenja državnim šumama zaključeni u skladu sa odredbama Zakona o šumama („Službene novine Federacije BiH“, br. 20/02, 29/03 i 37/04) i Uredbe o šumama („Službene novine Federacije BiH“, br. 83/09, 26/10, 33/10, 38/10 i 60/11) važit će najduže godinu dana od dana stupanja na snagu ovog zakona.

Član 95.

(1) Fizička i pravna lica koja posjeduju određena prava na državnu šumu dužna su ista upisati u zemljišnu knjigu kod nadležnog suda u roku od dvije godine od dana stupanja na snagu ovog zakona.

(2) Ukoliko prava iz stava 1. ovog člana ne budu upisana u zemljišne knjige u roku iz stava 1. ovog člana smatraće se kao da ne postoje.

Član 96.

Do donošenja uredbe Vlade Federacije BiH iz člana 53. stav 8. o načinu prodaje šumskih drvnih sortimenata porijeklom iz državnih šuma na teritoriji Federacije Bosne i Hercegovine primjenjivat će se Odluka Vlade Federacije BiH o načinu prodaje šumskih drvnih sortimenata porijeklom iz državnih šuma na teritoriji Federacije Bosne i Hercegovine („Službene novine Federacije BiH“, br. 52/09 i 25/10)

Član 97.

(1) Federalni ministar će u roku od godinu dana od dana stupanja na snagu ovog zakona donijeti sljedeće podzakonske akte:

- 1) Pravilnik kojim se propisuje način izrade, sadržaj i postupak odobrenja i revizije šumsko privrednih osnova za državne i privatne šume iz člana 12. stav 3. ovog zakona;
- 2) Pravilnik kojim se propisuje način doznake stabala za sječu i obilježavanja površina za sječu iz člana 15. stav 8. ovog zakona;
- 3) Pravilnik kojim se propisuju uslovi koje moraju ispunjavati izvođači radova u šumarstvu iz člana 19. stav 3. ovog zakona;
- 4) Pravilnik o uslovima i načinu polaganja stručnog šumarskog ispita iz člana 20. stav 4. ovog zakona;
- 5) Pravilnik kojim se propisuje obim mjera za uspostavljanje i održavanje šumskog reda i način njihovog provođenja iz člana 25. stav 8. ovog zakona;
- 6) Odštetni cjenovnik iz člana 27. stav 12. ovog zakona;
- 7) Pravilnik kojim se propisuje sadržaj planova za zaštitu od požara, način prikupljanja podataka, vođenje registra šumskih požara, uslove korištenja podataka i izgled obrasca na kojem se izvještava o šumskim požarima iz člana 35. stav 9. ovog zakona;
- 8) Pravilnik kojim se propisuju uslovi pod kojim se vrši pašarenje iz člana 37. stav 5. ovog zakona;
- 9) Pravilnik kojim se određuje način praćenja zdravstvenog stanja šuma iz člana 38. stav 2. ovog zakona;

- 10)Pravilnik kojim se propisuju uslovi za uzgoj, iskorištavanje, sakupljanje i promet nedravnih šumskih proizvoda iz člana 39. stav 8. ovog zakona;
- 11) Pravilnik o načinu obilježavanja granica državnih šuma, kao i vrsti i postavljanju graničnih znakova iz člana 51. stav 5. ovog zakona;
- 12) Pravilnik kojim se propisuje način i oblik vođenja registra evidencija za privatne šume iz člana 52. stav 10. ovog zakona;
- 13)Pravilnik o načinu i obliku vođenja registra evidencija za državne šume iz člana 54. stav 3. ovog zakona;
- 14)Pravilnik kojim se propisuje način vođenja katastra šuma za državne i privatne šume iz člana 56. stav 3. ovog zakona;
- 15)Pravilnik o načinu izvršavanja zadataka, obliku i sadržaju legitimacije čuvara šuma, izgledu uniforme i općim kriterijima za utvrđivanje čuvarskih reona iz člana 67. stav 9. ovog zakona;
- 16)Pravilnik kojim se utvrđuje postupak i kriteriji za dodjelu namjenskih sredstava u oblasti šumarstva iz Budžeta Federacije BiH iz člana 72. stav 2. ovog zakona.

(2) Federalni ministar će po prethodno pribavljenom mišljenju federalnog ministra trgovine u roku od godinu dana od dana stupanja na snagu ovog zakona donijeti pravilnik kojim se propisuje način žigosanja, obrojčavanja, premjeravanja, sadržaj i način izdavanja otpremnog iskaza za drvo, koje potiče iz državnih i privatnih šuma sa teritorije Federacije, kao i način vođenja evidencija, obilježavanja i izdavanja dokumentacije za drvene sortimente u unutrašnjem prometu, trgovini između trećih lica kao i prometu drvnih sortimenata iz uvoza iz člana 27. stav 10. ovog zakona.

(3) Federalni ministar će po prethodno pribavljenom mišljenju federalnog ministra okoliša i turizma u roku od godinu dana od dana stupanja na snagu ovog zakona donijeti pravilnik kojim se propisuje način izrade, sadržaj i postupak odobrenja i revizije programa gospodarenja zaštitnim šumama i šumama posebne namjene iz člana 28. stav 9. ovog zakona.

(4) Federalni ministar će, po prethodno pribavljenom mišljenju federalnog ministra finansija/federalnog ministra financija, u roku od godinu dana od dana stupanja na snagu ovog zakona donijeti uputstvo o načinu obračunavanja, rokovima i postupku plaćanja naknada za zaštitu i unapređenje šuma kao i izgled i sadržaj obrasca za obračun uplate naknade za općekorisne funkcije šuma iz člana 69. stav 3. stava ovog zakona.

Član 98.

(1) Zahtjevi koji su zaprimljeni, a nisu riješeni do dana stupanja na snagu ovog zakona riješiti će se u skladu sa odredbama ovog zakona.

(2) Po žalbama u drugostepenom upravnom postupku koje nisu riješene do dana stupanja na snagu ovog zakona riješiti će se u skladu sa odredbama ovog zakona.

Član 99.

Danom stupanja na snagu ovog zakona na teritoriji Federacije BiH prestaje primjena Uredbe o šumama („Službene novine Federacije BiH“, br. 83/09, 26/10, 33/10, 38/10 i 60/11) i drugih propisa iz oblasti šumarstva koji su u suprotnosti sa odredbama ovog zakona.

Član 100.

Ovaj zakon stupa na snagu narednog dana od dana objavljivanja u "Službenim novinama Federacije BiH".